

ASO TOFI, 23 OKETOPA 2014

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: I le agaga faafetai i lenei taeao fou, e i ai le talitonuga o lea ua tatou aofaga potopoto i lenei aso aua le tauavameaina ma le faaauuina o a tatou galuega e pei ona faapolokalameina ai mo lenei masina. E momoli atu ai pea le agaga faafetai ma le faamalo i le onosai mai o lo tatou Maota i ona tulaga faalupe i le afio o lau Afioga i le Taitai o le Atunuu aemaise lau Kapeneta ma le paia maualuga o le Maota Fono i lenei taeao. E talitonu le agaga ua tatou maua le faasiliga malosi e ala i feau, tiute ma galuega sa tatou feagai ai i le aso ananafi. Ua faafetai i lenei taeao o lea ua tatou tau mai lelei i a tatou Fonotaga faataatia.

O lo o faagasolo pea a tatou Fonotaga mai lava i le uluai aso e oo mai i le aso ona o le talitonuga o lo o tele ma anoanoai nisi o a tatou galuega e tatau ona faasolo mai i luga o le Laulau a Fono, ma le talitonuga o lo o sosolo pea i tulaga masani e pei ona faafae ai a tatou Fonotaga aemaise a tatou Tulafono Tumau.

O le polokalame i lenei taeao e pei ona silafia i lalo o Tulafono Tumau o lo o i ai le tulaga lea o Aso Tofi o lo o faatulaga ai polokalame faatulagaina mo le Maota Fono. O avanoa foi e le au maua ona o tulaga i le va faafeagai ai mo le faapolokalameina o galuega i itu o lo o tuufesili ai le Maota agai i le Malo. O tulaga ia ua uma ona aiaia i tulaga aloaia ma faiga faavae talafeagai ai. E tuu atu foi le fautuaga ma le tuualalo a le Fofoga Fetalai, ia faaoga lelei avanoa ina ia aua ne i vale tuulima le tapenapena lelei o sui usufono ona e le faamaumuina foi taimi o le Malo e tali mai i ni fesili e le faavaea po o ni fesili e le talafeagai, ae ua tapa finagalo ina ia tatou soalaupule na o mea anoa ma mea e talafeagai ai e manuia ai lo tatou atunuu, ae ona ua ausia e le Fonotaga lenei Aso Tofi ua manatu ai e faaoga o tatou taimi ina ia faatulaga ai tulaga e pei ona faailoa mai e Tulafono Tumau.

FESILI FAANATINATI (T.T.59)

FESILI MO LE AFIOGA I LE PALEMIA/MINISITA O TUPE.

FOFOGA FETALAI: O Fesili agai i le Afioga i le Palemia ma le Minisita o Tupe. Ou te tapa lau Afioga i le sui usufono, Afioga Afualo Wood Uti Salele e te tulai mai.

Afioga AFUALO WOOD UTI SALELE (Salega): Ou te faafetai atu i lau Afioga i le Fofoga Fetalai mo le avanoa.

- FESILI:** 1. **Afioga AFUALO WOOD UTI SALELE** – E fia fesili atu i le Afioga i le Palemia/Minisita o Tupe, po o le a le faamoemoe o le Malo mo pasi ma taavale, faapea aseta uma na faaaogaina i le SIDS?
2. **Afioga Hon PALUSALUE FAAPO II** – Po o afea e tali mai ai le Malo i le Lipoti a le Komiti Faa-Palemene mo Ofisa o le Palemene i le Lipoti a le Pule ma Suetusi Sili?

FOFOGA FETALAI: Tulai mai lau Afioga i le Palemia mo le taliina o Fesili.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI (Palemia): Lau Afioga i le Fofoga Fetalai ma le faaaloalo ou te tali atu ai e amata atu i le Fesili mulimuli.

- TALI:** 1. O tali a le Malo i le Lipoti a le Komiti Faapalemene mo Ofisa o le Palemene i le Lipoti a le Pule ma Suetusi Sili, o lo o tapena mai e Matagaluega ma Faalapotopotoga a le Malo. E tatau ona oo atu i le Fono lea o le a usua nei ua tatau ona atoa uma mai. E pei ona silafia, e le tapenaina mai e ni Minisita tali nei, e tapena mai e le afaigaluega a le Malo aemaise i latou o lo o faauluulu i ai Matagaluega, ma o le tóatele o i latou sa aafia tele i tapenaga o le SIDS na faatoa uma atu nei.
2. O le Fesili muamua i le faamoemoe o le Malo mo pasi ma taavale faapea foi aseta na faaaogaina. Ua uma ona aumai le lipoti a le Komiti sa latou soalaupuleina le mataupu lenei ma aumai ai nisi o fautuaga. O le mea muamua lau Afioga i le Fofoga Fetalai, o lo o i ai fono tetele ia e sosoo nei e fai i le faaiuga o le tausaga e i le va o le 800 ma le 1,000 tagata e auai. O lona uiga la e toe faaaoga i ai nisi o taavale nei, e faapena foi ma aseta e pei o nofoa. E sosoo le fono lea ma le faamoemoe tele o le atunuu lea e talimalo ai i taaloga a Malo o le Taupulega. O le aofai o Malo o le Taupulega e 54 e aofia ai Peretania, Ausetalia ma Niu Sila. O Malo tetele ia ma o le faatumulia ai foi Samoa ma e moomia ai foi le faaaogaina o taavale, ae i ai lava taavale e mafai ona faamatuu. O lea la ua lafo atu foi i le Komiti latou te faagaioia ma faatalanoa taavale e ono faamatuu ma taavale e ono taofia ma le tau foi e ono faamatuu ai. E oo mai i le taimi lenei masalo ua ova ma le 20 talosaga ua faatoai mai i lo tatou Malo mai Faalapotopotoga eseese e moomia ai aemaise lava aoga. O aoga nofo tumau, o faalapotopotoga e tai pei o le Red Cross, o faalapotopotoga lakapi ua talosaga mai foi ae faapea foi ma pisinisi tau turisi latou te moomia foi ni pasi. O pasi ia e agai mai i ai a latou talosaga. O lea foi la o lo o i ai le Komiti latou te faafoeina mea ia. A o le i faatinoina e toe aumai i totonu o le Kapeneta e toe vaavaai i ai le Kapeneta i fuafuaga

faaiu mo le faatinoina o le faamoemoe lea o le Malo. O lona uiga e i ai vaega o taavale i pasi ma aseta e faamatuu atu i tua, a o le vaega tele e taofiofi mo le faamoemoe lea o le Malo i isi tauaofiaga o fonotaga ma taaloga ia e mulimuli mai i le tausaga nei ma le tausaga fou.

Lau Afioga i le Fofoga Fetalai, o le tali atu lea ma le faaloalo.

FESILI MO LE MINISITA MO AOGA, TAALOGA MA AGANUU.

Afioga Hon PALUSALUE FAAPO II (Taitai o le Itu Agai): Lau Afioga i le Fofoga Fetalai ou te faamalulu atu ona o tuatuagia le maalofia o le Tofa Aveau, a o lea o le a ou faaauuina atu le Fesili i lau Afioga i le Minisita mo Aoga, Taaloga ma Aganuu.

FESILI: 1. Tofa AVEAU TUALA LEPALE NIKO PALAMO – O le a se finagalo o le Malo mo le siitaga mo faiaoga ona o lea ua agai o tatou faiaoga i Amerika Samoa, ae o le a se vaitau ua faatulaga ai se siitaga?

FOFOGA FETALAI: O lea ua maua atu. Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Ou te tali atu ma le faaloalo lau Afioga i le Fofoga Fetalai.

TALI: 1. O lea e taoto nei i luma o le Kapeneta le Lipoti i nisi o mataupu lea sa moomia. Ia manatua foi lau Afioga i le Fofoga Fetalai, o le tele lava o mea faapenei e oo foi i siitaga tetele ia sa fai i le 40% lea sa sii ai totogi i le 2006, 2007 ma le 2008, e i ai lava faaletonu i tapenaga a Matagaluega o lea la e i ai mea e faamanino. Ia manatua foi o aga ia a le Matagaluega o Tupe, e le mafai ona aumai loa se fautuaga fai loa ona o mea nei o totogi o mea e matua tuu i ai le atoatoa ina ia taumafai le Malo e faataoto lelei totogi i se vasaga e talafeagai, ia aua ne i i ai se mea e masepu. O le ala foi lena o lea lava e oo mai i le taimi lena o lea lava o lo o faitio pea le private sector i le tele o totogi ia na fesiitai i le 40% lea sa ou taua. E i ai lava la tapenaga e ala ai ona tuai, a o tapenaga e fitoitonu i nisi o mataupu e tataua ona faamanino mai e le Matagaluega o Aoga. O lea la o lo o tapa ai nisi o lipoti i le taimi lena, a o lea ua taoto i le Kapeneta le pepa lea mo le faaiuga e fai pe a clear uma uma.

Mo le silafia ma o lea e silafia lelei lava e le Taitai o le Itu Agai, o mataupu faapenei, o mataupu e le vavevave i ai se isi. E le faapea foi e aumai le faafefe lea ina ne i te i ua o uma i Amerika Samoa. E le o se mea e taofia ai aua o le aiatatau a le tagata, o le aiatatau e mafai ai ona alu i le isi atunuu pe afai

e fiafia ia e alu e galue ai i le totogi maualuga. E le mafai ona taofia le aiatatau, ae e le aumaia le taufaafefe e tuu ai le mea e tatau ona fai. O lea sa e saofai ai i totonu i le Kapeneta sa tatou fai faatasi ai le tonu lea. E le toe alu tatou i le mea tuai lea sa i ai, e fia tausaga o faatali le isi Matagaluega e le i oo atu lava le siitaga o totogi i ai. O le mafuaaga lena lea na ala ai ona tupu le teva tele lea i le tausaga e 1981, lea sa tatou faia ai le iuga ua tatau ona faatu se Tribunal faapitoa latou te tagofia mataupu faapenei. O lea foi la ua i ai le latou Lipoti o lo o laga mai ai itu uma e tatau ona silasila i ai. E faapena le liliuina o le tofa ma le faautaga mamao, ae e le faapea e oso mai loa puna fai se faaiuga. E te matua faaeteete ina ne i avea lou televave ma mea e toe faaopopo mai ai ma isi mau ala mulimuli e le mafai ona amo.

Lau Afioga i le Fofoga Fetalai, e malamalama lelei le sui usufono i le mea lea ou te talanoa atu ai.

FOFOGA FETALAI: Malo faafetai.

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: E leai se felafolafoaiga Palusalua?

Afioga Hon Palusalua Faapo II: E leai e tatau lava ona i ai se fesili.....

FOFOGA FETALAI: O le tali e le toe i ai se fesili o lea ua uma ona tali lau fesili. E leai se felafolafoaiga.

Afioga Hon Palusalua Faapo II: A faapefea la e tusa ai ma tulaga Faapalemene, e tatau ona i ai se follow up question aua e le o malie lou loto i le tali lea e aumai.

FOFOGA FETALAI: E leai, e le tulia i sou malie.

Afioga Hon Palusalua Faapo II: O le a la le aoga e fai ai fesili pe afai e leai ni follow up question?

FOFOGA FETALAI: O le tali e avatu e le Malo o le tali lena.

Afioga Hon Palusalua Faapo II: A aumai lava la le tali e faaletonu e fai lava la lau Afioga i le Fofoga Fetalai?

FOFOGA FETALAI: Ona pau lava o lou le manao e talia le tali, a o lea ua manino ia taatia i le Malo e fai a latou fuafuaga. O le tali lava o le tali.

Afioga Hon Magele Mauiliu (Minisita mo Aoga, Taaloga ma Aganuu): Lau Afioga i le Fofoga Fetalai.....

FOFOGA FETALAI: Ia se i tulai mai le Minisita mo Aoga, Taaloga ma Aganuu.

Afioga Hon Magele Mauiliu: Faafetai o lena ua saunoa atu le Afioga i le Palemia i le tulaga o i ai totogi, ae i ai le isi maga o le fesili lea ua ala ai ona ou tulai atu i le o o faiaoga i Amerika Samoa. Ae ou te le i tali atu i le fesili lea, ou te fia fesili atu lava i le Tulafono Tumau faamolemole. O lea e fai mai ia le itiiti ifo i le tasi le aso e aumai ai fesili. O le afa o le 12.00 ananafi i le aoauli na aumai ai fesili. O lona uiga e le i atoa la le aso. Pe matou te tali atu pea la pe leai?

FOFOGA FETALAI: E manatu ua manino le saunoaga a le Afioga i le Palemia. E faamalulu atu foi i lau Afioga i le Minisita, ona o le tulaga o le taimi faatapulaa, o lea faatoa tatou uia le atuvasa lea, o lea la e taumafai e faataitai le aualii fia fesili ia, se i taumafai e faauluulu mai i totonu le mataupu, a o lea e maitau atu na o mea e le tapena le mea lea e aumai. Ia se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le ala foi lena na fesili atu ai le Afioga i le Minisita, a maitau mai, o le Kapeneta lenei, o le Kapeneta e sauni i taimi uma. O lea la matou te iloa e tiga ona sese le mea lea e fai, a o lea ua matou ioe atu lava, ia tatou alu sese ai pea faapea.

FOFOGA FETALAI: Ia.

Afioga Hon Palusalua Faapo II: Lau Afioga i le Fofoga Fetalai, ou te tulai atu e tali i le Afioga i le.....aua o matou e ona fesili a o lea ua toe fesili mai, a? Aua o lea ou te iloa, na tapena fesili i le Aso Lua.

FOFOGA FETALAI: Leai e le o fesili ia te oe, e le o fesili ia te oe o lea e fesili mai ia te au. O lea la ua malamalama lelei le.....

Afioga Hon Palusalua Faapo II: Ia se i tali sao i ai i le taimi e fai ai fesili.

FOFOGA FETALAI: Ia, o le tulaga lea sa taumafai le Failautusi o le Fono e tau faasaosao le tele o piopio o a outou fesili ia na aumai, e tou te silafia lelei le mea lea e taumafai atu. I uma foi....o le naunautaiga o le Fofoga Fetalai i le tatou process lea ua alu nei, o i e fai a outou fesili, ae soia ia tou te o i luga o le TV ma le nusipepa ua tele ai le nunumi o tatou mea. O lea la e taumafai e tatai mai i le moa o le ala lo outou mamalu ma lo outou paia, tatou talanoa i inei, o i e agai i ai a outou fesili ma ia mautinoa, o a outou fesili o le avanoa muamua lenei, a le faaoga lelei ia o le tatou avanoa mulimuli foi lenei. A o lea lava o tau augani atu lau Afioga i le Fofoga Fetalai ma lena itu, aumai mea anoa ma mea mautinoa. O le ala lena o lou taumafai atu, silasila o lea ua tatou alu i le mea lea, ae ia outou mautinoa, agai i le tatou Tulafono Tumau ave fesili i lima o le Failautusi, ona faapena lea ona fetuunai ia ma ave le taimi e tapena lelei mai ai ia Minisita mo le tali. A o lea ua saunoa le Afioga i le Palemia, e tali lava i taimi uma ua sauni le Kapeneta mo tali.
O le fesili mo.....

Afioga Hon Palusalua Faapo II: Lau Afioga i le Fofoga Fetalai e i ai lava si vaega lava lea. E leai se aoga e fai ai a tatou fesili, ae le o malamalama

lelei, e tatau ona i ai pei lava ona tatou maitauina i Palemene i fafo, e le faatonua lau Afioga ae na ona ou faapena atu, e tatau ona i ai ni follow up questions, supplementary questions e fai gutu i o e fua i le tali la e aumai. O le mea la lena o lea e tatalo atu ai lau Afioga.....

FOFOGA FETALAI: Ia o lea ua ou.....le Taitai o le Itu Agai, o lea ua ou maua lou finagalo, taatia laia o lea e faasolosolo le tatou galuega o le aso muamua lenei, e tasi lava le fesili a sau loa le tali ua manino lau faalogo, o le na, ioe, o le taualumaga lena o le tatou galuega.
O le fesili mo le Afioga i.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Ia tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ae na o se vaipanoa lava lea. E talu lava ona ou sau i totonu o le Palemene lenei, o le mea lava lea o lea e tau faatonutonu, o le avatu o le tali a iinei ae le ioe i ai ia sui usufono ona toe tulai mai lea e toe tulituliloa le tali. A o Fofoga Fetalai uma lava talu ona ou maua mai, o le tali lava lea, e avatu loa le tali a le Malo, o le tali faaiu lava lena, e le toe i ai lava ma se isi mea. Ia o le toe fesoasoani atu lena lau Afioga lea ua tuu mai ia....sa aafia ai foi ma le Fofoga Fetalai lea sa tau tulai mai nei i lena mataupu, o le tali lava e avatu e le Malo, o le tali lava lena.

FOFOGA FETALAI: Ia e pei o le agaga lena o lea e taumafai atu ai le faamalalamalama i le tatou faiga fesili i lenei taeao. O le tulaga i le supplementary fesili le Taitai o le Itu Agai, ia o lena e te silafia. A faapea foi e le i ai, ia ona toe tusi mai foi lea o le isi supplementary fesili e toe table i luma o le tatou Laulau a Fono. O le faatulagana na o faasologa o tatou fesili, faitau i le 57, 58 ma le 59, leaga o fesili faanatinati lea tatou te i ai.
O le fesili.....

Afioga Hon Palusalue Faapo II: Lau Afioga i le Fofoga Fetalai e faamalie atu lava, aua o le upu moni lava, o se matatia fou lenei talu ona e tulai mai, ioe, o le tele o isi Fofoga Fetalai e le i i ai ni mea faapea, ae pau lava le mea lea ou te tulai atu ma lou faaloalo, ia fai ia maea. A? O lea ua e faia le matatia, a o le fautuaga ia fai ia maea ia faataga le fesili.

FOFOGA FETALAI: O lea ua maua le Taitai o le Itu Agai, e te le tau fai mai i le tulaga lena. O lea ua ou maua lou finagalo, ae ala ona maea lelei, o la outou tapenaga lelei, ae le o le lau mai o le mea e le paleni ona outou naunau lea e faapaleni e au.
O le fesili mo le Afioga i le Minisita mo Galuega, Felauaiga ma Atinae Eese, tulai mai lau Afioga i le sui usufono mo Gagaemauga Nu. 2.

**FESILI MO HON MANUALESAGALALA ENOKATI POSALA,
MINISITA MO GALUEGA, FELAUUAIGA MA ATINAE ESEESE.**

Tofa LEVAOPOLO TALATONU (Gagaemauga Nu. 2): Lau Afioga i le Fofoga Fetalai, e faafesili atu lava i le Minisita mo Galuega, Felauaiga ma Atinae Eseese ona o le tulaga lea i le alasima lea i Leone po o Vaisigano o se sima taua tele i le tuli faapuupuuna o taimi o le aufaigaluega aemaise foi o fanau aoga i...o le faafesili la:

FESILI: 1. Po o afea e fausia ai le auala laupapa i Leone lea sa faaleagaina i le afa o Evans, ae ua maua ua leva ona faaaga ia se vaega seleni mo lea faamoemoe?

Ma le agaga faaloalo lava.

FOFOGA FETALAI: O lo o i ai le fesili i lalo o le suafa o le o le Taitai o le Itu Agai, ma sa ou toe maitau lelei i lenei taeao le tulaga o le fesili lea ma ou fautuaina ai ma fesili muamua atu, ua i ai ni faamaoniga o le fesili lea, ua i ai ni faamaumauga aloaia e faamaonia le tulaga lea e ala ai ona mafua ona e fesili, o fea o i ai? Ia e le mafai la ona ou faatagaina le fesili e fai, ona o le tulaga e le mafai ona tatou o e fesiligia ni mea o tala o le matagi ma le savili, e le maimaua lo tatou taimi tatou te agai e iloiloina. A toe fai ni tulaga faapea mo le lumanai, o fesili e tatau ona tuu mai ma aloaia. Sa ou tapa le Failautusi o le Fono nei i le taeao ma maua ai. E maua le avanoa i se taimi mulimuli pe a tapa uma mai faamaumauga, ina ia aua ne i felavasai pe le maua ai le tali a le Minisita.

Tulai mai le Minisita e tali mai i le fesili lea i le auala laupapa ae taatia le fesili lea ae le i faaauauina ona o le tulaga mo se taimi mulimuli. Tulai mai lau Afioga i le Minisita.

TALI: 1. Afioga Hon MANUALESAGALALA ENOKATI POSALA (Minisita mo Galuega, Felauaiga ma Atinae Eseese): Faafetai i lau Afioga i le Fofoga Fetalai, ou te manatu e le toe pā'ia paia ma maua lava o lenei taeao o le Maota nei, e asa foi le gasu aua le alofa ma le agalelei o lo tatou Atua.

Ae i lau vaai i fesili uma, ia o lea ua faaalua lou finagalo i le fesili lea i le EPC, ae moni a au. I lau vaavaai o mataupu nei e tuuina mai, o mataupu e tatau ona talatalanoa ai i Faauluuluga o Faalapotopotoga nei ona manino laia o tulaga ia, e le o ni fesili foi ia e tuga e ono oo mai i totonu o le tatou Palemene nei.

O le isi vaega o lea e tau maituina, ia pei e ese le mea e faatoai ai fesili ia, ae o Faauluuluga lava o Matagaluega ma Faalapotopotoga, ia o i latou e aumai ai mea anoa ma mea moni, ae afai e agai atu i le faamalama, ia o lona uiga o le gaioi po o le faomea, po o le vaega foi lea o le moetolo.

Ae mo le auala laupapa, o le tali, o la ua galulue mo le tusia o ata ua uma ona sainia le konekarate latou te tusia ata e fau ai le auala laupapa, o le tulaga lena o lea e i ai nei. O le

faamanatu, o galuega ia e fesoasoani mai ai ia le Faletupe o le Lalolagi, e le o ni...e matautia lea fesoasoani lea e faatino ai a tatou auala. O fesoasoani nei e maioio lelei ia vaega, e i ai foi aiaiga e tatau ona ausia, ia ona mafai ai lea ona faamatuu mai o tupe, e amata mai i lona tulaga o le faatinoina ma tapena ia ma fesootai seia oo ina tusia ata, a tusia ata, ia o le tapenaina o le terms of reference e tapena ai ia mea, ia e aumai lava mai le Faletupe o le Lalolagi tulaga e tatau ona maioio, e i ai foi ia tulaga e tatau ona ausia e tusa ai ma requirements a le Faletupe o le Lalolagi. O vaega uma ia, afai e maea, tuuina atu ua atoatoa faasalalau. O lona uiga o se process e tilotilo i le tolu i le lima tausaga o faatino galuega nei, e le o ni galuega e fai loa tuu mai se tupe e faatino ai, leai, e le o le faiga lena. Ou te iloa foi o la e silafia ma manino ma malamalama, o aiaiga na. O le ala foi lena e nanau mai ai a tatou paaga nei e aumai le fesoasoani i Samoa, aisea? Leaga e lelei ona faatino e le Pulega, e lelei lana faigamalo ma le vaaiga o galuega, o le ala lena o lea e sasaa mai ai, sasaa mai ai lenei tamaoaiga e faatino ma fesoasoani i le tatou....O le ata faataitai, o la e fai galuega i tua i West Coast Road i ina i Samusu e tau i Lalomanu, o le tasi lena fesoasoani na tuuina mai e le Faletupe o le Lalolagi o lo o faatino ai. O se galuega maoae foi lea galuega pe a maea ona faatino.

Ina ua maea le 2012, sa toe sui atoa ai le polokalame lea a le Faletupe o le Lalolagi i isi o latou galuega sa faatulaga mai, ia ua tau ai i lalo o le ERAP o le Emergency Road Excess Projects, o galuega ua faatino i lalo ua suia mai ina ia mafai ona faatino i se taimi vave galuega ia, la e i ai le auala la ua faatino nei. O le isi vaega o le four lane lea e sosoo mai i Vailoa seia paia tuaoi o Saina ma Vaitele, ma o le auala lea o la ua fai nei le evaluations o le konekarate latou te faatinoina lea galuega e ova ma le \$20milion, o le faaiuga o le tausaga nei e tatau ona amata ai le galuega lea, a i ai se fetuunaiga ina ia fua i le tau, ia ona amata laia i le tausaga fou, a o le tasi ia o galuega tetele o lo o fesoasoani mai ai le Faletupe o le Lalolagi. E ala ona masaa mai, lelei le faafoega, lelei le vaaiga o tupe o lo o tuuina mai, lelei le pulega ma le vaaiga, o le ala foi lea o lea e maua ai e tatou avanoa nei. Ia tatou onosai ma tatou faapalepale, aua o le mea foi lea o tatou tupe o lo o maua, o lea e faatino ai a tatou routine maintenance, o galuega foi, ia faaleleia ai o tatou auala. O le tapenaga mo le Fonotaga lea sa faatino nei, o lea e maua mai o tupe o lo o tapena e le Malo ma le Pulega o Felauaiga i le Laueleele, lea e faatino ai a tatou galuega, e le gata i lea o tupe o lo o faasao, lea e fai ai a tatou auala galue. O polokalame uma na o lea e mafai ona faatino, aua foi e talia e le Faletupe o le Lalolagi o lea e fesoasoani mai e ala i isi a tatou poloketi nei, a o mafuaaga ia o lea e sasaa mai ai, lelei le faafoega o a tatou galuega ma mea uma o lo o faatino ai.

Afioga Hon Palusalue Faapo II: Lau Afioga i le Fofoga Fetalai, ua umi lava le saunoaga a le Afioga i le Minisita, pau lava le fesili, o afea e fai ai? Ae ua alu...e pau lava lea o le mea lea e fia malamalama ai, o afea e fai ai le auala laupapa?

FOFOGA FETALAI: O lea ua....se le Taitai o le Itu Agai, taatia pea le tali lea ua saunoa i ai le Afioga i le Minisita lea sa tuu avanoa i le...o le faamalalamamaga le mea lea e fai mai ina ia manino, o afea. O lea ua manino e ala ona faaumiumi o mea a le Faletupe o le Lalolagi.
Ia faaii maia le....

Afioga Hon MANUALESAGALALA ENOKATI POSALA: O le agaga lena o lea sa taumafai e faaali atu aua leaga e le na o le fesili, e i ai tua o patatua i fesili ia e aumai, o lona uiga a faamanino ma faamalalamama, ia ona manino ai laia o le agai i luma ma isi fuafuaga o lo o i ai.

Na ou fia tali atu i le tulaga i le fesili lea i le EPC, ae faafetai o lena ua e saunoa mai, sese uma mea ia e aumai nei, ana aumai uma i i, ia ua moomia se faamaoniga o tuuaiga ia e i i, ae o le a ou le tali i ai, ma le agaga faaloalo.

FOFOGA FETALAI: Ia malie lau Afioga i le Minisita, malie lava, malo faafetai. Ia e pei o le agaga foi lena lau Afioga i le Minisita na taumafai atu ai le....

Afioga Hon Palusalue Faapo II: Lau Afioga i le Fofoga Fetalai....

FOFOGA FETALAI: Alaala i lalo lau Afioga, alaala i lalo le Taitai o le Itu Agai. O le ala lena o lou taumafai atu lau Afioga i le Minisita, e le mafai foi ona ou tuuloaina, silasila foi i le taumafai atu i le taeao, ia ona o le tulaga lava o lo o tauave ai le tatou Fono ina ia taoto i le agatonu i tatou Tulafono Tumau, a o lea foi ou te avatu le tuualalo ma le apoapoai i Minisita, ia 'aia le faateia manu i ofaga le tofa ma le finagalo, ae o lena e taua lou finagalo, o le ala lena o lou tuu avanoa atu, se i faamalalamama le umi, e le o se mea televave le faatinoga o polokalame ma le tapenaina o le Faletupe o le Lalolagi lea e tatou te agai i ai, e agai uma i ai talosaga a le Lalolagi atoa. Ae toa foi tatou. Le paia ma le mamalu o le tatou aufai fesili, a sau lava le tali, e le uma ai le fai aso o le Alii.

Ia se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ana faapea e le o faasalalaua mea nei, ae na o tatou lava o lea tatou te talanoa, na ona fesili mai lava alu atu ma le tali e leai lava ma se tuai, e ala ona taumafai ia le aiga Kapeneta e faalautele mea ia, ina ia malamalama lelei mafuaaga e ono tuai ai ona faatino ona i ai tapenaga ia e moomia e latou e ana tupe. A le faia la mea ia, ona le faaauauina lea o galuega, ae pei o le mea lena o lea ou te malamalama lelei i le mea la e agai mai ai le la Itu, tau lava o le fai mai alu atu loa taeao, uma. Ana faapea la na o tatou, o, e puluafi le alu o tali. E le i atoa le lima minute ua uma uma lava ona tali atu mea ia. A o le tulaga lena leaga e i ai foi le faaeteetega, leaga o lea e alu faasalalaua i tua o a tatou felafolafoaiga, ina ia malamalama mai ai i latou i le mafuaaga o lea mea ma lea mea. Aua e uma

loa foi a tatou talanoaga, ona o ifo foi lea o le au tusitala faasee Palu ona sese atu ai lava lea lau Afioga i le Fofoga Fetalai. A o le taua ia o faamatalaga ia e avatu e le Aiga Kapeneta ina ia malamalama lelei ai le faafogafoga mai a Samoa.

Afioga Hon Palusalue Faapo II: Lau Afioga i le Fofoga Fetalai, ma le faaaloalo lava....

FOFOGA FETALAI: Malo faafetai. Palu o lea ua manino le tatou mataupu.

Afioga Hon Palusalue Faapo II: Ioe, o lea ua manino, ae leaga o lea na lavea i le saunoaga a le Minisita e faapea e sese uma mea ia e i ai le fesili muamua, a o la e na sui uma fagauila o afi. O lona uiga la e le sese le fesili lea a o lea ua usitaia ua tuu ese e lau Afioga.

FOFOGA FETALAI: Ia a lea ua ou fai atua, aua.... Palu, alaala i lalo le sui usufono. Se i taumafai ona lauama tootoo le mea lea ou te fai atua. Na ou taofia le fesili aua ne i faataunuina ona ou te talitonu e le o lava faamaumauga e tatau ai ona fai. O lea e lauama tootoo lau Afioga i le Taitai o le Itu Agai, o lea ua ou le taliaina le fesili ona o le tulaga e pei ona ou faaalua.

O le Fesili mo le Minisita mo Faatoaga ma Faigafaiva. Tulai mai lau Susuga i le Faafeagaiga, se tasi o sui usufono mo Salega, Tofa Tapuai Toese Ah Sam. O le a le tonu o le Fesili?

Afioga Hon Palusalue Faapo II: Lau Afioga, sa ou manatu e maua ai le avanoa o le Afioga i le sui usufono e fai ai sana faamatalaga....

FOFOGA FETALAI: Se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea ou te tilotilo atu i le sui usufono e te i. O au la ua ou le mailoa po o le faiga lea a le Taitai o le Itu Agai na te faia Fesili ona tufatufa lea e aumai e ana sui usufono e aunoa ma le logoa o latou e faatatau i Fesili. O lea la ua fesili atu i le sui usufono ae pei e te i mai ona tu ae loa lea o Palu lau mai le Fesili na ia tusia.

FOFOGA FETALAI: Ia, se i tulai maia Tapuai Toese leaga o lea sa tau lou suafa i le tatou lisi.

***Tofa TAPUAI TOESE AH SAM (Salega):** Lau Afioga i le Fofoga Fetalai ma le mamalu o lenei Palemene, o le mea muamua lava faafetai i lo tatou Tama i le lagi, e leai se loto e fai pe ana momoe ma le toe feala mai. Ia, ae mo le silafia e le tatou Palemene, o Fesili nei, sa talanoa i le matou Caucus, ua uma ona matou tapena i ai, e le faafuaseia le Itu lenei, ioe. O matou foi, ua matou fia maua le mea lea o le sau lava alu atu, ae aua le toe.... Ua tatou fia oo lava i ai, ioe. Ae o Fesili na sa matou discuss ina. Ae talu ai la ona o au o le Minisita Agai mo Faatoaga ma Faigafaiva, o lea la ua tuu mai ai, ae na ou talosaga la i le matou Taitai, fai ia Ia ma ou sui. O le faamalalama lena ma lou faaaloalo lava.

Lau Susuga i le Taitai, leaga ua uma ona ou tofia Oe, aua a tatou o i le aganuu, e pule le Taitai ia te Au i isi taimi, ae a tatou o i le faa-Kerisiano, e pule Au i le Taitai, o Au o le Ao o Faalupega, ia tu i luga e fai le Fesili.

FOFOGA FETALAI: Ia, se i tulai mai lau Afioga i le Minisita mo Tina ma Tamaitai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nu'u ma Afioga ma Agafesootai): Lau Afioga i le Fofoga Fetalai, e faateete lava i le tatou galuega ona e taitaiina le Maota leni i Tulafono Tumau. A o le sui usufono e sau ma le fiapoto ae faaali mai i i ae le fetai ma Tulafono Tumau, na pau lava le afu o le tuli i fafo pe ana o au, ae faaloalo i le Faifeau, ae le avea foi le Faifeau e pei e tau taalo mai ai i le Maota, e tataua ona tulai le ua i ai lona igoa i le Fesili e faaleo mai le Fesili. Na pau lava lena, aua le tau aumaia i luma faapea o ni mea a le Faafaletui, ae fai mai le Fesili leaga o lona suafa lena ua tusia ai le Fesili. Afai la e... o lona uiga, e le tataua ona faaleoina le Fesili leaga o lea e i i le sui usufono. O le mea seiloga e absent le tagata e ona le Fesili la e tusi ai, ona faatoa mafai lea e se sui usufono ona fai. O le Tulafono Tumau lena e manino lelei. Ma le faaloalo lau Afioga.

FOFOGA FETALAI: O lea ua maua le finagalo o lau Afioga, o le ala foi lena... Malie lava Palu se i fai lau tala lea, leaga o lea ua agai mai le Afioga i le Minisita mo Tina ma Tamaitai, Atinae o Nu'u ma Afioga ma Agafesootai ia te Au nei le Fofoga Fetalai ma le faafoefoaina o le tatou Fono. Ia malu ave i fale lou finagalo pe afai o le a foi sau silasila i leni aso, ona o le faamoemoega o lea foi ua saunoa malamalama le Palemia, leai o la e teitei mai si toaina o Tapuai po o le a le mea ua tau ai lona igoa i le Fesili. O lea foi sa faaali manino le tulaga o le felafolafoaiga i le latou Vaega Faaupufai, ia o lea lava e toe lafo agai i le Taitai e faia le Fesili. O lea la ua sau le faatonuga a Tapuai ia Palusalua, e tu la i luga e fai le Fesili. Ou te talitonu foi e le o ni ai e avea ai, i tulaga ua outou silafia foi o le Afioga ia Tapuai o lea faatoa fai lana lauga faataupou i le taeao leni. Ou te manatu o le uluai taimi lea o lea faatoa faafofoga le Maota i le folasaga a le Afioga i le sui usufono mo Salega. O le agaga lena, ae ou te talitonu e le o se agaga lena faapea o se faasiliaupule.

Se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ae a la pe a e tuu maia se avanoa se i matou patipati ai?

FOFOGA FETALAI: Ia, tulai maia Palusalua e faaauau mai le Fesili.

Afioga Hon PALUSALUA FAAPO II: Lau Afioga i le Fofoga Fetalai, ou te faamalulu atu i le Afioga i le sui usufono o leni Itu. Ou te talitonu lava, e sao le sui usufono mo Salega, Tofa Tapuai Toese Ah Sam. O Fesili uma lava nei, sa talanoaina i totonu o le Faafaletui faatoa aumai ai. Ae masalo o le tulaga lea e saunoa i ai le Alii Faifeau, ona e le i faia sana lauga faataupou a o lea o le a fesili atu. E pei la o le mafuaaga lea ua toe tapa mai ai, atonu o le a

sauni agai luma mo sana lauga faataupou. Ae ui i lea, o le a ou usitaia lau faatonuga, o lea o le a ou faia le Fesili.

FOFOGA FETALAI: Malie leaga o la e ua toe tulai mai se tasi o sui usufono mo Salega, Tofa Tapuai Toese Ah Sam. O le sui usufono lea e sau le faatonuga... Se i toe alaala la i lalo se i tulai mai Tapuai.

Tofa Tapuai Toese Ah Sam: Ua ala o na ou toe tulai atu, leaga o lea sa ou faatali i lau faatonuga, o au e ese lou ava i lau Afioga i le Fofoga Fetalai. Ana e toe faatonu mai lava ou te faia le Fesili, ou te faia lava. Ae o lea ua e talia ma iloa ai, o Oe o le tagata o le Atua, ma e tele le tofa lena. Faafetai atu i lau Afioga i le Fofoga Fetalai, ma e faafetai atu foi i le Palemia, o lea ua talia lau talosaga vaivai, o lau Maiden Speech lena i le Palemene lena. Faafetai tele le faaloalo.

** Lauga Faataupou i le Aso Lua, 21 Oketopa 2014.*

FOFOGA FETALAI: Ia aumaia se tatou patipati tele. O lea ua faafofoga le tatou Maota i lenei taeao, e manatu foi ua leva ona taliga le tofa ma le faautautaga i lea Itu o le motu, ae ua avea le faataitaiga o a outou Fesili, ua maua mai ai ma le avanoa e fai ai le folasaga manino a se tasi o sui usufono mo Salega.

Ia tulai mai ia lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, ona sa ou faaulavea i le sui usufono mamalu i le tuuina mai o le Fesili, peitai o lea ua tulai ma saunoa, o lea foi ua talia e le Palemia, o le a faia le Taitai o le Itu Agai ma tavini a le sui usufono mo Salega, Tofa Tapuai Toese Ah Sam. Ma le faaloalo.

Afioga Hon Palusalua Faapo II: Lau Afioga, ua leva lava ona olo le fua i saunoaga le mafaufau a le Afioga i le Minisita mo Tina ma Tamaitai, Atinae o Nuu ma Afioga ma Agafesootai, a o le tatou vafealoaloai ma upu ua talafo mai e pei e fia Fofoga Fetalai. A ua le toe filifilia i le Fofoga Fetalai ona o ana mea valea na fai. A o lea la ua sau nei ma faaupuga ia, o la e maitau mai le atunuu.

FOFOGA FETALAI: Malie ia Palusalua, ia toa pea le tai, e faapena lava auga o le tatou Fono.

Afioga Hon Palusalua Faapo II: Se se i fai ma le avafatafata le tatou Fono. Aua le le mafaufau, ae ui i lea...

Afioga Afualo Wood Uti Salele: Lau Afioga i le Fofoga Fetalai, se faamolemole e aveese upu ia na saunoa i ai Leulumoega e le talafeagai. Faafetai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, ona o upu o lea ua felafai, ae mo le silafia e le Taitai o le Itu Agai,

na ou faamavae ma le tofi o le Fofoga Fetalai ona o lou fia Minisita. Ia ua e vaai la i ai i le mea o le tagata e faamanuiaina? E tofi lava i le Minisita. Ae aua le saunoa faapea ua le faaaogaina au e le Itu Faaupufai i le tofi o le Fofoga Fetalai. Na ou faamavae. A o le mea foi lea e saunoa mai ai le sui usufono mo Salega, Afioga Afualo Wood Uti Salele e aveese, e leai se mea o afaina ai. E te le toilalo ai i lou fai atu o Oe o le tavini a Sagone ma Salega. Ae tulai maia lau Afioga e faaauau lau Fesili.

Afioga Afualo Wood Uti Salele: Lau Afioga i le Fofoga Fetalai, ou te ofo ia te Oe Leulumoega, e te faafailele upu ae te le mafaufau. Aveese nei upu, o le Maota leni tatou te omai i i e lufilufi ai ma faasoa lelei manatu, o la e faafogafoga le atunuu. Faafetai.

FOFOGA FETALAI: Malo. Ou te manatu o le agaga lena o lea e tau faaoololomaaui i le tatou Maota. Afai foi ua siisii le tai i leni taeao, o suaga lava o le vaatele ma le taumafai mai o le tatou avanoa leni.

Na pau lava lea o le mea lea e talosaga atu ai i le Taitai o le Itu Agai ma lena Itu, silasila foi outou i avanoa ia e taumafai atu, na pau lava lea o le auga ma le faamoemoe o le taeao leni, ia maua lo outou avanoa, a o lea e maitau atu, o lea o le a tau agai ina tulai i se isi tulaga le tatou mataupu ona o le le tapenaina lelei o le tatou faamoemoe. E tele lava pe a ou agai atu nei e talatala le tatou faamoemoe. A toe tuu mai a outou Fesili ona faatoa soalaupule lelei lea i le tulaga aloaia, ae le o se mea matagofie lea mea o le fesili mai e le auai, fesili mai e le i sauni, o lea ua toe lafo mai ia te Oe.

O le agaga lena e tatalo atu ai i lena Itu, a avatu le avanoa, ia fai lelei le tatou avanoa. E le ma nofonofo foi le Itu leni pe a faalogo atu e le o tapena lelei tatou. A o le agaga ma le faamoemoe, o lea lava e laalaa i luga taualumaga faa-Palemene, o lea tatou te osiosi ma faafailele.

E ui i lea, tulai mai ia e faaauau le Fesili ona maea ai lea.

Afioga Hon Palusalue Faapo II: Lau Afioga i le Fofoga Fetalai, o lea ua e agai mai i inei, a o upu ia na lafo e o, e le o ni upu lelei, lea e talosaga ai e aveese ma faamaumauga. A o lea ua e agai mai nei pei o matou lea e sese. A o upu ia e lafo mai, e le o ni upu... e mataga.

FOFOGA FETALAI: O lea ua e agai mai a o lea e le i faia lau upu ia Leulumoega. Alaala la i lalo se i fai atu lau faamatalaga. Tulai mai lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, ua avea lava ma mea mamafa le felafolafoaiga i leni taeao ua atagia ai le ituaiga i'a foi lea na saunoa ai Vaai o i'a o le papau. Ae silasila foi lau Afioga, e faaeteete tele au i le gafa o Malietoa Taulapapa, o le manava o au na fananau atu ai.

Afioga Hon Palusalue Faapo II: Lau Afioga i le Fofoga Fetalai, o lea lava ua ova le le mafaufau. Se i silasila? Se i vaai? O le manava lea na ou fanau ai.

Tofa Hon Tolofuaivalelei Falemoe Leiataua: O le ala lena, ia saili le gafa ona e iloa lea po o ai Malietoa Taulapapa e fananau uma ai tagata nei.

Afioga Hon Palusalua Faapo II: A lea e te le mafaufau ae... O Oe o le i'a o le papau.

FOFOGA FETALAI: E faamalulu atu, malie... e faamalulu atu foi i lau Afioga i le Minisita mo Tina ma Tamaitai, Atinae o Nuu ma Afioga ma Agafesootai. E i ai le talitonuga e tua atu i ina le faamaopoopoga ma le faafilemuina o le tatou Fono i lau tofa Leulumoega. E talii foi ae popoe leaga o lea e faafogafoga le atunuu, aemaise foi o le faafogoga a lea Itu o le Maota, ne i vale tuulima tuleiga ma saunoaga ona faapea lea o le le manatu foi i lea Itu. Ae tatalo atu e faamama le sausau ma le finagalo.

Tofa Hon Tolofuaivalelei Falemoe Leiataua: Ua uma foi, ae faatoese atu i lau Afioga i le Fofoga Fetalai, ae ou te talitonu, o au nei e fai si matua o le tofi lea ou te tauavea i tagata uma nei e i le Itu Agai. O le Tiakono Toeaina e tataua ona ou faapalepale. O lea la ua ou faapalepale, e talitonu lava o le a le ave ma tulaga e tee ai le uluuluga i le la Itu. O upu faa-Fono, e tanu foi i inei i Mulinuu ma Tiafau. Ma le faaloalo.

FOFOGA FETALAI: Faafetai. Ia, tulai mai lau Afioga i le Taitai o le Itu Agai e faaauu mai le tatou Fesili lona ono.

FESILI MO LE MINISITA MO FAATOAGA MA FAIGAFAIVA.

Afioga Hon PALUSALUA FAAPO II: Faafetai. O le mea lea e sese ai a tatou mea o le aumai o tofi i o fai i i. Ave lou tofi e fai i le tatou Ekalesia.

FESILI: 1. Tofa TAPUAI TOESE AH SAM - Po o le a se tala i le \$5milionā mo le aufaifaatoaga na aafia i le Evans ae o lenei ua 3 tausaga o lo o faatali pea le aufaifaatoaga?

2. Po o le a se tala i le fesoasoani SACEP, po o ua fia ni tupe ua faasafua atu ae pe fia foi ni aufaifaatoaga ua maua lea fesoasoani?

FOFOGA FETALAI: Ou te tapa lau Afioga i le Minisita mo Faatoaga ma Faigafaiva mo le tali i le Fesili pei ona tuuina atu.

Afioga Hon LE MAMEA ROPATI (Minisita mo Faatoaga ma Faigafaiva): Ma le faaloalo ou te tulai atu ai e avatu se tali e uiga i mataupu ua tuuina mai po o Fesili foi.

E pei foi ona saunoa atu le Minisita mo Aoga, Taaloga ma Aganuu, e pei o le tulaga lena. E manaia lava le vave aumai o Fesili e lelei ai ma sauniuni lelei ma sao lelei tali e tuuina atu i a outou Afioga. Ua ou fiafia lava i le taeao ina ua ou vaai atu o i ai le fesili a lou uso faifeau ia Tapuai. Na ou faapea o le a ave lea ma ana saunoaga faataupou i lenei aso, e fesili mai ai ia te au ona

ou tali atu lea, ae malo faafetai ua faafofoga le Maota i lou siufofoga. O lea foi e faafofoga mai lou itumalo ma le atunuu; ua faamalo lava.

TALI: 1. O le Fesili muamua po o le a se tala i le \$5miliona mo le aufaifaatoaga na aafia ia Evans ona o lenei ua 3 tausaga o lo o faatali pea le aufaifaatoaga.

O le upu lea e faapea po o le a se tala? O le tala, silasila foi a outou Afioga, o le faatalanoaina o le mataupu lenei e ese i latou sa faatalanoaina ma le World Bank, ese i latou o lea ua faatinoaina nei. Ia manatua la ina ua uma ona faatalanoaina le mataupu lenei, sa faasalalau loa tagata e omai e form up le group lea po o le vaega lea e faagaoioia le poloketi lea i le afa o Eveni. Sa umi foi se taimi sa alu ai. E tóatele le aufaigaluega sa faasalalau avanoa nei ma apply mai i ai. O isi foi taimi e le talafeagai tagata sa talosaga mai, ona toe readvertise lea. O le mea lene sa umi ai ona sa tau form up le vaega lea o lo o faagaoioia nei.

O le tali atu la, o fuafuaga o le poloketi lenei a le World Bank e tau set up le mea e tau o le E-voucher system lea e faaoga ai le IT, aua e leai se mea i totonu o Samoa o lea faatoa fuafua i nai kamupani foi ia mea nei fau fale e i ai kamupani nei o le Blue Bird, SMI ma kamupani faapena e tau faatulaga ai le mea lea, ona amata loa lea ona faagaoioi le faatalanoaina o le aufaifaatoaga sa aafia. E umi lava la se taimi o nei mea aua e le faapea o ni tupe ia e tuusao atu i le aufaifaatoaga mo mea fau fale la e moomia e i latou. A faapea o le faifaatoaga e \$4,000 le tupe ua uma ona faatulaga mo mea sa faaleagaina, ona fai lea o le voucher, ona alu lea po o ai le kamupani e alu ia e aumai ai lana oka ona avatu ai lea po o laupapa, sima, fao ma mea faapena, ae e le o ni tupe e tuuina atu sao.

O le amataga o le mataupu lea sa amata ua lua nei masina talu ai, ua maea atu la le 100 a o lea ua faagasolo. Ua uma ona alu atu le tufa i tua, a o le 200 lea ua faagaoioi i le taimi nei, ona uma foi lea faasolo atu le isi vaega.

O le tali atu lene ma ia manatua, o tali ia o lea e i totonu o lou mafaufau i a matou feiloaiga i nai masina po o nai vaiaso ua tuanai atu ma le vaega lenei lea ua faaalu atu nei, ae e le o ni tali ua tusitusia lelei i totonu i inei ona o le tuai mai o a tatou fesili. A o le mataupu ia o lea ua faagaoioi, o lea ua solosolo lelei lava. Ua uma le 100, o lea ua faagaoioi atu le isi 200 ma faasolosolo atu ai lava lea seia maea lelei le \$5miliona lea e i le Fesili.

O le tala foi i le mea lea o le SACEP, o lene ua uma ona ou faamatalaina atu i le tele o tualumaga a le Palemene i aso ua tuanai. E \$31.5 miliona le aofai o le tupe. E faapena foi le amataga o le mea lenei. E ese i latou sa faatalanoaina le poloketi lenei i le amataga na maua ai le tupe, ese foi le vaega lea ua form up latou te faagaoioia. E faapena foi le faiga e pei o le mea lea, sa faasalalau foi avanoa. E saili le

co-ordinator po o le o le a taitai ai i le vaega lea, aumai le staff. E maua lava le 10+ o le aufaigaluega o lo o i totonu lava i le vaega lea. E pei o le tasi lena mea sa tau umi ai foi le faagasologa o le mataupu lenei. E pei ona outou silafia, e 20% o le saofaga a le tagata, o le mea lea e tau o le equity, o le mea lea o lea e faaoga i ai lona fanua ma mea faapena, e 30% o le saofaga a le tagata ia, ae 50% o le grant e tusa o le tupe e avatu fua. O le tulaga la ua tulai mai, a faapea e \$15,000 le tupe lea e talosaga mai ai le tagata, o lona uiga o le 30% o le tupe lena o le saofaga a le tagata, a o le isi vaega lena e 50%, o le tupe lena e avatu fua. O le faiga la o lea e fai ai, e fai lau saofaga, ae a le maua se tupe a le tagata e fai ai lana saofaga, e mafai ona maua lana loan i tului maualalo. O le tupe la lena e toe totogi malie e le tagata i le faletupe, a o le isi vaega lea e 50% e leai se mea e toe totogiina.

O le la ua faagaoioi foi ma ua maea atu le isi 50 tagata o le aufaifaatoaga ia ua i ai nei. E tóatele lava nai a tatou faifaatoaga mai Savaii. O lea la ua faagaoioi atu foi le isi 200 ma o lea la ua solosolo malie lava le tulaga lea. E i ai la nai mea ua tulai mai aua o le fuafuaina o le polokalame, e amata muamua le faagaoioiga o lau galuega i lau saofaga lea po o le 30%. A faapea la e amata lau galuega, ona e sau lea ma au lisiti ave i le vaega lea e faagaoioia, ona alu atu loa lea o le asiasiga. A vaai atu o lena ua amata lau galuega, ona faatoa avatu loa lea o le isi vaegatupe lea. A o le mea lea ua tulai mai ina ua tau faagaoioi le polokalame, ua i ai foi le aufaifaatoaga ua o fai loan, ua fiu e tatali lisiti e aumai e avatu ai le grant. O lena mea, ua ese le mea na o e loan ai tupe ae sue atu e pei ua o fai ai ni o latou faalavelave. E le mafai la ona avatua le grant lea pe a le aumaia lisiti ia ma o atu le asiasiga. O nai mea na o lea ua aliae mai i le taimi lenei. E le faapea la o faifaatoaga uma, a o nai faifaatoaga laiti lea ua tau aliae mai i le taimi nei, o le loan lea na fai na avatu i tului mama, ae avatu le faia ai le poloketi ae alu atu fai ai isi mea. A o faafofoga mai la le aufaifaatoaga, o le tasi lena mea o lea ua tau aafia ai le tatou mataupu lea. O le aofai o le tupe lea ua faaoga e oo mai i le masina lea i le aso 30 Iuni, e tusa e \$4.9milion. O le va la o Iuni e tau mai i le taimi lenei, o lea foi faatoa taunuu mai i le vaiaso lea na tea nei le uta mamoe lea na aumai i Fiti. O lena foi e alu ai le isi vaegatupe sa faataatia foi mo lena mea, e \$297,000 le tupe na alu ai. O lea foi la ua fuafua le uta manu papalagi lea e aumai mai Ausetalia, masalo o le amataga o le tausaga lea e taunuu mai ai, a o lea ua mautu uma systems i totonu i le vaega lea e faagaoioia ma o lea la ua faagasolo lelei le tatou polokalame lea.

O le tali puupuu atu lena i a tatou Fesili e pei ona tuuina mai ma le faaloalo.

FESILI MO HON TUITAMA TALALELEI TUITAMA – MINISITA MO LE SOIFUA MALOLOINA.

FOFOGA FETALAI: O le Fesili mulimuli agai i le Minisita mo le Soifua Maloloina. Tulai mai lau Afioga i le sui usufono mamalu.

Tofa MOTUOPUAA UIFAGASA AISOLI VAAI (Vaisigano Nu.2): Faafetai mo le avanoa lau Afioga i le Fofoga Fetalai. O lau fesili, o si tamai fesili lava.

FESILI: 1. Tofa MOTUOPUAA UIFAGASA AISOLI VAAI - E i ai se faamoemoe o le Malo e toe fai se tatou CT-SCAN i le Falemai i Motootua ona e moomia e le tele o mai?

Afioga TOEOLESULUSULU CEDRIC POSE SALESA SCHUSTER (Aana Alofi Nu.3): Faafetai lau Afioga i le Fofoga Fetalai mo le avanoa. O le Fesili foi e agai i le Minisita mo le Soifua Maloloina.

FESILI: 1. Afioga TOEOLESULUSULU CEDRIC POSE SALESA SCHUSTER – O a ni tapenaga a le Matagaluga mo le puipuia o Samoa mai le EBOLA o lo o masalomia e aafia i le EBOLA?

Tofa Lealailepule Rimoni Aiafi: Lau Afioga i le Fofoga Fetalai ma le faaaloalo lava. Pe i ai se taimi faatapulaa o tali faamolemole?

FOFOGA FETALAI: O lea e te saunoa mai o lea ua ou talosaga i le Afioga i le Minisita i sana tali puupuu lava.

Tulai mai lau Afioga i le Minisita mo le Soifua Maloloina.

Afioga Hon TUITAMA TALALELEI TUITAMA (Minisita mo le Soifua Maloloina): Lau Afioga i le Fofoga Fetalai, ua ou usitai i lau faatonuga. E na o le tailua lava upu o tali ia, ae peitai ou te fia faaaogaina le avanoa leni e avatu ai sina faamalamalama ona.....

FOFOGA FETALAI: Lau Afioga i le Minisita, e tatalo atu pea ma le agaga faaaloalo ona e talitonu lava o lo o tele nisi o a tatou galuga o lo o fia faagasolo. A o lo o i ina le tofa ma le faautautaga, na ona faamanino lava ona o popolega i le EBOLA lea e faapea ua ulufale mai, a o le a lafo atu i le faautautaga a lau Afioga i le Minisita.

Afioga Hon TUITAMA TALALELEI TUITAMA: O le a taumafai e faapuupuu atu.

TALI: 1. Ou te faafetai i lou uso a fofai, Tofa Motuopuaa mo le fesili i le CT-Scan. Ua avea foi lona siufofoga po o sona finagalo faaalua e avea ma sui o le anoanoai o le atunuu o lo o tuufesili pea i tua ae e le o oo mai i totonu o le falemai, semeamanu e maua atu ai le tali vave lava mo le tulaga lea. E pei ona silafia o le tatou CT-Scan lea o lo o i ai nei i le falemai na

aumai i le Malo o Saina. Ua fai la sina leva talu ona faavaatua le auaunaga a le CT-Scan lea ona ua faasolo ina matua. Na fausia loa le falemai fou, na amata loa ona agai fuafuaga ua tataua ona i ai se masini e malosi atu ina ia talafeagai ma tulaga o i ai le laa i luma o auaunaga faapea i totonu o isi atunuu. O lea la sa tau saili ai lava le Soifua Maloloina i ana paaga faasoifua maloloina ina ia maua mai ai se fesoasoani mo se CT-Scan, peitai ane, e pei ona silafia o nei masini e le o ni masini taugofie, e faitau miliona le tau aemaise la ituaiga masini ia o lo o moomia mo le taimi nei ua fai lava sina maoae o le tau. O le ala lea sa tau saili ai pea se auala e mafai ai ona faatino le auina mai o le masini lenei. Ae peitai, ua siliga tali i seu se faamoemoega mai a tatou paaga masani o lo o lagolago mai ma fesoasoani mai i auaunaga faasoifua maloloina, o lea na talosagaina ai loa ma e faafetai mo le tulai mai o le Accident Compensation Board, o lea na mafai ai ona faatino le faamoemoe lea o le a ou taumafai e tolaulauina atu, ona o lo o i ai i totonu o aiaiga o le faatinoga o le latou auaunaga se vaega e mafai ai ona auala mai ai le fesoasoani lea. E faafetaia ai foi le Taitaifono ma sui o le Komiti Faatonu o le Accident Compensation Board i lo latou amanaia o le talosaga a le Soifua Maloloina, o lea na fai ai loa le talosaga i le Malo ina ia mafai ona talia se feagaiga i le va o le Soifua Maloloina ma le Accident Compensation Board, ma o lea la na ave i ai le faamanuiaga a le Kapeneta ma faagasolo ai loa ia fuafuaga mo le auina mai o masini. Ia ma e faapea la fuafuaga, o le feagaiga foi lea o le maliega po o le Memorandum of Understanding lea na sainia ia Iulai o le tausaga nei e mafai ai ona tuuina mai se seleni e tusa ma le \$1.5miliona mo le faatauina o le masini lea. E manatua foi la, e le faapea a saina loa ona aumai loa lea o le masini aua e tataua ona saili muamua, po o a specifications o le masini e manaomia ina ia mafai ai ona faasalalau ia ē e tauofo mai ina ia fai agai i ai a latou ofo mo le faatinoga o le auina mai o le masini. O lea la na faasalalau ai loa Tauofoga i le aso 15 o Aokuso o le tausaga nei ma na tapunia i le aso 15 o Setema. Ma o le aso 15 la o Setema o lea na talai ai loa ia Tauofoga nei, ma e tolu ofo na tuuina mai – ma o lea la Tauofoga, sa fai i ai le filifiliga i le aso 16 o Oketopa o le masina nei. O lo o galulue pea la mo le filifiliga o se kamupani o i latou ia na tuuofu e tuuina atu i ai ia le faatauina mai o le masini lenei. O le a maea tapena ia vaega uma e faamoemoe mo le aso 27 o Oketopa o le masina nei, ona faailoa atu loa lea pe faailoa atu i le kamupani ua manumalo i lea Tauofoga ma ave i ai le 3 masina po o le 90 aso e faatino ai loa le auina mai o le masini. O lona uiga la, o le faamoemoega o Ianuari i le tausaga e 2015 ua tataua ona taunuu mai ai ia le tatou CT-Scan fou ia ma faapipiina loa i le falemai ma amatalia loa ia auaunaga e faaogaina ai lea masina. Ia o le tali atu lea e tusa ai ma le faafesili i le CT-Scan.

O le EBOLA, ia faafetai foi mo lenei avanoa ua mafai ai ona faafofoga mai lo tatou atunuu i tulaga o tapenaga, e anoanoai tapenaga o lenei faamai, aua o lea o lo o faagasolo pea ia ē e maliliu i le faamai nei i nofoaga i Aferika i sisifo, o lea o le a mafai ai e le tatou Matagaluega ona faailoa atu tapenaga, aua o le taimi lava na maua ai le tulaga lea i le EBOLA aemaise foi o le tulaga taufaafefe lea na i ai ia e sa galulue i atunuu ia e i ai le EBOLA lea na auina atu i Amerika ma le oo atu o le EBOLA i Amerika ma Sepania, ia o se tulaga taufaafefe lea mo atunuu uma lava o le lalolagi. O le tulaga mautinoa lava ia, e laitiiti le avanoa e oo mai ai le EBOLA iinei i le tatou atunuu le Pasefika pei la o Samoa, ae afai e oo mai, e matua matuia ni aafiaga o le tatou nei atunuu e vaivai le tamaoaiiga mo le tali atu i ia ituaiga faamai.

Mo le silafia e le mamalu o le Fono o le faamai pipisi o le EBOLA pei ona faasalalauina mai i faamatalaga o nusipepa, TV faapea uega tafailagi, o se faamai matautia ma ogaoga ma ua toatele tagata i Aferika i sisifo ua maliliu ai. I le taimi nei, ua aliae faamai i Amerika ma Sepania po o Spain, ua toatele foi tusa pei ona tatou faafogafoga pea i ai i talaaave mai i luga o TV ma uega tafailagi, ia ua ova atu ma le 4,000 i latou ua maliliu i le faamai lea. E itiiti se avanoa e oo mai ai lenei faamai i Samoa pe a faatusatusa i taiala ua tuuina mai e le WHO ia po o le Faalapotopotoga foi lea o le Soifua Maloloina o le Lalolagi e uiga i lenei faamai o le EBOLA. Peitai, e matautia ma ogaoga taunuuga pe afai e oo mai se tasi ua aafia i lenei faamai isi o tatou atunuu o Samoa nei. O fuafuaga ma alafua faataatitia mo le tali atu i le pipisi mai o le ituaiga faamai, ua maea ona faataoto e le Matagaluega o le Soifua Maloloina. E manatua foi, e le na pau lea o se tulaga tau faamatau ua aafia ai lo tatou atunuu, o le 2003, ia sa faateia ai foi tatou i le pipisi mai o le faamai foi lea o le SARS, oo mai i le 2009 o le H1N¹, o lea foi sa tapena i ai le tatou Matagaluega ma fai i ai puipuiga ma taumafaiga i malae vaalele ma tulaga faapena e ono auala mai ai le faamai lenei i totonu o Samoa. Ma o le tausaga nei i le pesi mai o le Chikungunya o lea foi sa tapena i ai le tatou Matagaluega, ua i ai la le tomai i totonu o le tatou Matagaluega, a fua mai i ia tapenaga i faamai pipisi foi lea sa faamatauina ia le tatou atunuu, o lo o ua uma ona faataoto – ma o lea la ua toe amata ona toe faaolaola ma faamalosi i le taimi nei, aua le tali atu ma le puipuiga o Samoa mai aafiaga o le EBOLA. O nei alafua o fuafuaga faataatia ua aiaia ai puipuiga faasoifua maloloina i totonu lava o Samoa faapea puipuiga faasoifua maloloina faava o Malo po o le International Health Regulations faapea le Asia Pacific Strategy for Emergency Diseases po o le APSED, o tapenaga a le Matagaluega mo le puipuiga o Samoa mai le EBOLA.

Muamua, ua faatinoina galuega a le Komiti Faafae i le soifua maloloina mo faalavelave faafuasei ma le matuia, po o

le National Health Sector Emergency Disaster Management Committee.

Lua, ua amatalia galuega i le puipuiga o faamai i le va o femalagaiga i le ea ma le sami, i malae vaalele ma uafu faava o Malo, Faleolo International Airpot, Fagalii Airport, Matautu Wharf, Aleipata Wharf po o le Boarder Control ma le Port Health.

Tolu, ua faamalosia fonotaga ua tailua i vaiaso ona fai a le Komiti Faapitoa e tulimataia faamai pipisi i Samoa po o le National Communicable Disease Control Committee.

Fa, ua siitia nei ia le tulaga o le tulimataia ma le tali atu i le pepesi mai o faamai pipisi po o le Enhance Surveillance and Response to Disease Outbreak.

Lima, ua faagasolo ia le tapenaina o le fale suetoto mo le suesueina o vaega manaomia e auina atu i fale suetoto faava o Malo i atunuu mamao, o le WHO Collaborating Centre Bio Security Lab Level IV.

Ono, o lo o ua i ai nei tulaga manaomia mo le faatotogaina o falemai mo le taofia ma le vaaia lelei o gasegase equipment for isolation facility.

Fitu, o tapenaga mo le tulaga manaomia aua le puipuiga ma le saogalemu, po o le personal protective equipments o le aufaigaluega a le Soifua Maloloina. Pei foi ona tatou faalogoina, o le toatele o i latou ia o lo o togafitia ē e aafia lea ua toatele le aufaigaluega a le soifua maloloina ua aafia ai, pei foi o lea e oo lava i Amerika o le atunuu e tele le tamaoaiga, ia lea e toalua teine fomai ia na aafia ai ona o se case EBOLA na oo atu i ai i le falemai.

Valu, o lo o ua faagasolo nei tulaga manaomia mo le faataatiaina ma le faatinoina o aoaoga mo le puipuiga o le aufaigaluega faapea le mamalu o le atunuu, pe a masalomia ua aafia i le EBOLA, infection prevention and control training.

Iva, faatinoina o polokalame faalauiloa aua le nofo malamalama o le mamalu o le atunuu e uiga i le EBOLA, health awareness and education and risk communications.

Ma lona sefulu, ua talosaga faalapopotoga o le soifua maloloina o le lalolagi i Samoa le tatou ofisa lea e i ai le alii foi lea o Dr. Bao Ping Yang mo nisi auala e mafai ai ona fesoasoani mai ia Samoa mo ana tapenaga aua lava le EBOLA.

Ma o galuega la ua faatinoina po o lo o ua fuafuaina, o alafua ma fuafuaga faataatia pei ona taua i luga, o lo o talosagaina ai le Matagaluega o le Soifua Maloloina o le Lalolagi le lagolago a le Malo le Palemia ma le Kapeneta, aua lona faatinoina – ma o galuega nei, o lea ua faatino i le taimi nei.

O vaega o le puipuiga muamua faamatalaga mo le faalauiloaina o le EBOLA po o le risk communication. Lua, fautuaina le faaititia o le soona femalagaai atu i atunuu

mamao aemaise lava atunuu ua aafia i le EBOLA, e i ai Liberia, Sierra Leone, Guinea, Republic of Gongo, America ia faapea foi Spain po o Sepania.

Tolu, galuega mo puipuiga i le va o femalagaiga i le ea ma le sami i malae vaalele ma uafu faava o Malo po o le Boarder Control. Muamua, pepa fesili soifua maloloina, health declaration form for arrival mo tagata femalagaai uma e faaopoopo i le Immigration Declaration Form, pepa foi ia e tufa i totonu o le vaalele e faatumu o le a malaga mai i Samoa.

O lona lua, aoina o pepa fesili ma vaavaaia o tagata malaga mai e le aufaigaluega o le soifua maloloina.

Tolu, faaopoopo le aufaigaluega a le Soifua Maloloina i malae vaalele ma uafu faava o Malo.

Fa, potu ua maea ona tapenaina i le malae vaalele mo le siakiina e se fomai o se tasi ua masalomia i se faamai pe na malaga mai i atunuu ua aafia a o le i ulufale e faatino lana kilia masani, o la ua i ai le tatou potu lea na amata mai i le taimi o le SIDS, ona o tapenaga lava lea ne i te i ua sao mai se isi ma se EBOLA i lena foi taimi, o lena la ua i ai lava le tatou potu lena i le malae vaalele lava ia, i totonu lava o le malae vaalele ona aumai ave sao i ai le mai i totonu e siaki muamua ona faatoa alu ai lea e fai lana kilia.

Tulimataina o le faatamaia o lapisi mai vaalele pe a taunuu ma le faatumuina o pepa o galuega faatino – Proper aircraft waste disposal and border control forms. E manatua foi o e malaga mai i vaalele e faaoga ipu ma tissue, o mea faapena, o lapisi la na e ao mai i le taimi e tapena ai le vaalele mo le isi faigamalaga, o la e ua i ai fuafuaga ina ia vave loa ona aumai ma faatamaia loa, ia aua ne i umi o taatia ne i te i ua ave ma auala e saofia mai ai faamai.

Galulue vavalalata ma isi Matagaluega mo le Puipuiga i malae vaalele ma uafu. E i ai le Matagaluega o le Va i Fafu ma Fefaatauaiga, Pulega o Tagata Tafafao Maimoa mai Fafu, Matagaluega a le Palemia ma le Kapeneta, Matagaluega o Faatoaga ma Faigafaiva, Pulega o Uafu ma Malae Vaalele Faava o Malo, faapea foi ma kamupani vaalele ma vaa.

Ma le vaega mulimuli, o le tapenaina o le falemai i Faleolo e taofia pe nofo vaavaaia ai se tasi ua masalomia po ua aafia i le Ebola. O lea ua tapena le tatou falemai lea i Faleolo i le taimi nei. A faapea loa ua masalomia po ua i ai se isi, ia ave sao loa i ina ma o lea foi la ua i ai tulaga manaomia mo le puipuiga e le gata o tagata lautele, ae faapea foi le aufaigaluega.

Ma le vaega mulimuli ua mataituina o faamatalaga o faamai pipisi i le Pasefika ma atunuu mamao, po o surveillance and Pacific public health surveillance, network po o le pac net.

Lau Afioga i le Fofoga Fetalai, e toe avatu ai le faamalo ma le faafetai i lena avanoa aua e le o faasalalauina i nusipepa nei tapenaga ma nei galuega lelei o lo o fai mo le silafia e

atunuu. Na pau lava le mea lea e tumu ai le tele o nusipepa, o mea e faaletonu, ae le o faasalalauina mea o lo o lelei ma matagofie ona tapena e le Malo mo le saogalemu o ona tagata, ae na o le tilotilo masae lava ona aumai loa lea faafront page mai e faaleaga ai le Malo.

Lau Afioga i le Fofoga Fetalai, o le tulaga lena, ia manuia le Fono.

FOFOGA FETALAI: Malo. Ia, e momoli atu le agaga faafetai tele i le tali malamalama a lau Afioga i le Minisita. E manatu foi sa tuu atu lava le avanoa ona o le taua o le faamalamalama, aemaise o le taua o le Fesili na tuuina atu e le sui usufono mamalu, leaga o lea ua tatou i le vaitau o le tatou aafiaga i lenei foi faamai oti matautia ua oo mai. Ae atonu ua manino ma malamalama le atugaluga, aua o le atugaluga lena o le sui usufono mamalu, masalo o le atugaluga foi lena o le toatele o nisi o le atunuu. Ae faafetai tele i lau Afioga i le Minisita, o lea ua e tali manino ma e tali malamalama, e le o faatamala le Matagaluega ma lau Afioga i le puipuiga o lenei faamai. O le agaga faafetai lena. Ma ua taualuga ai foi ma lenei faamoemoe i lenei taeao.

E momoli atu le agaga faafetai tele i lau Afioga i le Palemia ma le Kapeneta. O le tulaga lava ia, o nisi o laasaga taua ma nisi o fuafuaga i a tatou Tulafono Tumau Faa-Palemene. E faamalulu atu foi pe afai o i ai se lape o le auunaga a le Ofisa o le Fono, ia e taua tulaga uma e matimati ai mo le lumanai. E fautua atu foi i lau Afioga i le Taitai o le Itu Agai ma le paia ma le mamalu maualuga o e e fia fai Fesili, ia tautuana e tapena lelei a tatou Fesili i mataupu anoa ma faamaonia, ma ni tulaga e atagia ai o ni mataupu e tataua ona fesiligia i le tulaga faanatinati ma mea e manuia ai le tatou atunuu. E ui i lea, e le i fausia Roma i se aso se tasi, o le tatou vaa e fautele, e faifai lava lelei. A o le tulaga o lenei aso ma le faamoemoe, e momoli atu le agaga faafetai.

TULAFONO TAU FAAOFI O LE FONO A LE AU TUSITALA MA LE AU FAASALALAU 2014 – felafolafoaiga faaauau i luga o le faitauga faalua mai le aso 22/10/2014

FOFOGA FETALAI: E tolopo le tatou Galuega i le aso ananafi o lo o saunoa le sui usufono mo Faleata Sisifo. Ou te toe tuuina atu lenei avanoa e saunoa mai ai e faaiu le saunoaga ona faapena lea ona faagasolo ai nisi o sui usufono mamalu o lo o fia saunoa i le taua o lenei Tulafono Tau Faaofi.

Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai mo le avanoa, aemaise foi o le mamalu o le tatou Palemene i lenei taeao matagofie, ua sii foi le viiga ma le faafetai i le Atua. Tasi lenei taeao iloga o le Palemene o Samoa, e ese lou mimita i lenei taeao, leaga o le fua a Samoa ua agiagia. Ua faigofie ma matagofie lenei taeao i avanoa. Se i vaai i le faigofie? E tasi le itula, tele le mau fesili i le mea sa nofo le manino ai nisi o sui usufono ma le faafofogaaga a Samoa, ua manino atoatoa i lenei taeao. Faafetai i le Malo i lau Afioga i le Palemia ma nisi o Minisita i le tali malamalama, ua faamalamalama foi atugaluga o lenei Itu, o le mea aoga, leaga o tatou lea e pepese i upu foi nei o le transparency ma le accountability.

O tatou o le Palemene ua matua. Faafetai tele i lau Afioga i le Fofoga Fetalai, ua tau lou ai i lenei taeao, aemaise foi o le sui usufono mamalu mo Salega, o lea ua tatou patipatia lona avanoa matagofie faaauo i lenei taeao. E tasi lava le tali e le i atoatoa, e fai si faaletonu i lau faalogo, o le tali mulimuli, i le tapenaga mo le Ebola.

Sa ma talanoa ananafi ma se Malu o le Malo sa i Aferika, e faapea, ua atoa le vaiaso talu ona i inei. Ou fai atu; ‘Sa valaau mai la le falemai ia te oe?’ Fai mai, ‘Ia, na valaau mai nei ua atoa lou vaiaso.’ Ou faapea, ‘oohh, ana e sau la ma le faamai ua le aoga tatou.’ Ae faafetai i le Afioga i le Minisita o lea ua matua manino lelei lau faalogo i le matagofie o nei galuega lelei ua latou faia ma tapenaga aua foi nei faamai. I te i foi ua tatou popole i nei faamai, a o lea e feoti tatou i le ova o le ai ma le le koleni ma isi faamai ia ua tatou masani ai.

Ona oo mai lea o lou manatu i le tatou Tulafono Tau Faaofi....

FOFOGA FETALAI: Malie le sui usufono o lo o saunoa leaga o lea ua e toe afea le tulaga ua toe taua ai le tatou mataupu ua tea atu. Tulai mai lau Afioga i le Minisita mo le Soifua Maloloina.

Afioga Hon Tuitama Talalelei Tuitama: Lau Afioga i le Fofoga Fetalai, e le faalavelavea le saunoga a le sui usufono mamalu, ae pau lea o le mea ua ou tulai atu ai, leaga o lea sa pei ua misi ia te au, o le isi lea vaega o le Fesili lea na tuuina mai, o i latou foi nei sa faigaluega i Sudan lea ua toe foi mai. O lea la pei ona taua, o le sui lea o le Matagaluega o Leoleo ma Falepuipui lea sa faigaluega i Sudan lea na taunuu mai i nei i le aso muamua o Setema. O le mea moni a faapea o Oketopa lenei, ai ua leva ona maliu pe a faapea e sau ma se Ebola. O lea foi la ona o le sui e aafia i le gasegase o le suka, sa i ai la sina manua sa i ai i lona aao, o lea sa tulimataia e le tatou Matagaluega, ua uma ona togafitia ma ua saogalemu, ua faamaonia e le o aafia i le Ebola. Ma le faaloalo.

FOFOGA FETALAI: Malo faafetai. Agai sao i le tatou... O lea ua tatou i le Tulafono Tau Faaofi o le Fono a le Au Tusitala ma le Au Faasalalau 2014.

Tofa LEALAILPULE RIMONI AIAFI: Faafetai lava i lau Afioga i le Minisita. O lenei Tulafono Tau Faaofi, muamua a o le i faia se manatu, e lagolagoina e lenei sui usufono, ae i ai nai atugaluga o le a faaali atu pea i ai se tuualalo i le Afioga i le Palemia ma le Kapeneta. E manatua ai foi i le Tulafono Tau Faaofi se tasi o tama sa tele sona sao, le Susuga Papalii, faamalo foi i lana galuega sa faatino i lenei Tulafono Tau Faaofi. Ae o le auga autu o le Tulafono Tau Faaofi, o le taumafai lea e siitia le tomai faa-Tusitala, atoa ma le faatuatuaaina o latou o lo o galulue, ia latou tausia foi aiatatau a isi tagata ma i latou e ono aafia i la latou galuega. Ou te talitonu, o le mea lenei o le Media Council, o le mea e tatau lava ona fai e latou, le Au Tusitala, aua e le faapea o se mea foi lea e fou, po o se faiga e le o faia i nisi atunuu. E tofua lava atunuu o le lalolagi ma le itutino lea e vaavaaia le faatinoga o galuega, le code of conduct ma le code of practice i le faatinoga o galuega a i latou nei. Ae ou te talitonu, ua ala ona faatinoina e le Malo le vaega lea, ua leva tele tausaga o faatalanoaina lenei mataupu, ae foliga mai e le mafai ona i ai se autasi i le Au Tusitala e faamaopoopo ai le latou Sosaiete ma faamaopoopo ai se itutino taua faapea. O lea la ua i ai le Tulafono Tau

Faaofi lea ua tuuina mai ina ia faatinoina loa se Media Council po o se Fono Faufautua a i latou o Tusitala. Na pau la lou popolega pei ona saunoa foi nisi o sui usufono, o le faatupeina la o le Council lea, aua o le taimi lava e faaogaina ai tupe a le Malo e so o se Faalapotopotoga, e tatau ona toe lipoti mai, e accountable, leaga o tupe a le atunuu, o tupe faitele pe faapefea ona faaogaina. Ae pe o le a i ai foi la i ina ma le tutoatasi pe tumaoti ai le faatinoga o galuega a le Council lea pe afai o le a ave i ai se tupe a le Malo e faafoe ai. O le atugaluga lea ia te au. Afai foi la o le a ave i ai se tupe, ona o lea e foliga mai e le o mafai ona faamaopoopo ma tuuina mai ni tupe mai le Au Tusitala, pe i ai se aiaga foi lea tau ina amata ai le faatuina o lea itutino ona faamatuu lea i tua i se taimi foi lea e mafai ai lava e latou ona sue ni tupe e faatino ai. Afai foi o lea, leaga o lea e foliga mai e lua vaega o le Tulafono Tau Faaofi, Muamua, o le faatuina o le Council, Fono a le Au Tusitala. Lona lua, o le faatuina o le Sosaiete. E lua mea ia, JAWS, a? Lea na saunoa i ai nisi ua tatau foi ona aveese lea mea o le JAWS aua ua le toe i ai se Western Samoa ae faaigoa o le JAS, e tatau ona faasao ai le Tulafono Tau Faaofi. O le mea la lea afai ua finagalo le Malo e faatu loa le Council, o le a la le mea ua le faatu ai loa na o le Council? E tatau ona i ai se itutino faapea e regulate ina atoa ma vaavaaia atoa le galuega a le Au Tusitala, taatia le Au Tusitala latou e o e fai le latou sosaiete, fai se latou... aua ou te talitonu o la e sa i ai. Aua e fiafia tele le nusipepa e talanoa i aso uma ma faamanatu mai ia tatou le mea lea o le accountability ma le transparency. A o le mea tonu lea e tatau ona fai i ai, e tatau ona taulamua latou i mea nei. Ae foliga mai e le o mafai ona galulue faatasi latou e faia se mea taua faapea ma se itutino tonu faapea e vaavaaia a latou galuega.

O le mea la lea o lea e fautu atu ai, se i toe tagai tasi le Malo i le faatinoina o le itutino lea. Afai foi e fai se ofisa, ia, aua pe na o se ofisa e tilotilo i mea nei ma faatupeina i le taimi nei. Afai e i ai ni faasea a le lautele o le atunuu, e mafai ona faatoai sao i ai, ae taatia le sosaiete ia e fai le latou sosaiete. Ia na o se manatu i ai i le tulaga lea, aua o le faatinoina o Council ia i atunuu i fafo, pei lava o lea e faatupe e latou ia ma fai e latou.

Ona ou oo mai lea i le faasologa mai aua e pei o le Tulafono Autu i le taimi lea e ave ai sau faasea foi lea ina ua aafia lou suafa po o oe i se tusitala. O le faasologa o le faatinoga o le faasea i lau maitau, e fai tele si umi, aua e tuu mai le sefulu aso e fai ai lau tusi. A le tali mai le tagata lea na faia le tala lea e aafia ai oe, toe ave i ai le isi 20 aso, ia ona faasolosolo ai lea faapena, faatoa fono lea o le Council, toe tapa mai oe. O le umi ia ona process i lou talitonuga. E le mafai ona i ai ni fetuunaiga foi ia ina ia vave ona tali? Aua afai e uma le masina o faatali le faasaoga o se mataupu, o le masina atoa lava lena o la e te faatali a o la e lava e faifai oe. Aua o tatou nei o sui usufono ma tagata aloaia o le Malo, e sao ai le tala a le isi au uo foi lele le upu faa-Peretania foi lele lea e fai i tai i le tulafono, o le tele o tagata foi lea a molia, 'e innocent until proven guilty,' a o tatou nei e fai loa se tala foi lea ia oe, o oe nei ua guilty i mafaufau o tagata, e guilty until proven innocent, ioe, e tele le aafiaga tai pei la o le mea lea na ou laga foi ananafi i le mea lea na tupu i lou sui usufono, leaga e moni e pei e faataata a lafoga ae le faigofie, leaga e very sensitive issue, o le mea sa tatau ona suesue lelei e le TV ma suesue e le aufai nusipepa pe moni faamatalaga ia e o atu ma tagata nei. Ma na ou oo i ai ananafi, faafetai aua o lea na saunoa manino le Palemia atonu na outou faalogologo mai i ai, ia na vave ona faamalulu mai, ia malie ua omai lava

tamaiti ua aumai le ads fai ae le o iloa e matou aua e le o se tala foi lea o se story, e le mafai la ona matou screen ina ae le i alu. O le tele ia o le faaletonu, e le i lelei sau moe anapo lau Afioga, ua valaau mai tagata o lou aiga ma lou nuu, o isi e valaau mai e faamalie e faamaualalo le loto, a o isi e valaau mai, ua tatau loa ona fai i ai se fuafuaga. E faapena uiga o le olaga, ioe. Ae faafetai i nisi o tama matutua o lenei afioaga o faafofoga mai, le fetalai ia Pula ma nisi o sui matutua na o atu nei i le taeao matou feiloai, ia ua aumai foi le faamalulu ma le... aemaise le tapuaiga a nai matua, o lea na vili mai lou tama i le afiafi ua ou le fiafia leaga e i ai ma le igoa o le toeaina, Leala sau, ia ou alu atu loa, o le toeaina pau lava le taimi e vili mai ai ia te au, ou te alu atu e fai se ma ligiligi i le afiafi, ae ua ese lea ua ou alu atu ananafi, o, ua matua si ou tama ua iloa uma e le itumalo, ou te iloa na matai e le i fanau le tagata lenei, fai mai loa, 'sau, alu i fale e aumai lau kao velo ia la e i fale, ka o lea e lava lou malosi e fai ai le mea.' Ia ua ta fiafia la i le tuualalo a si loomatua, fai mai, 'tama, ua 50 tausaga o ta nonofo ou te le i ai i se ia i lau tao a o lea o le a oulua o ma lenei tao,' ia ou fai atu loa i le toeaina, ia faafetai, fai mai si loomatua, 'Leala a sisii mai ou lima i le TV i Aso Sa i a outou lotu ese lou fiafia ia oe,' loto mauualalo ma faamaualalo,' ia lenei, faafetai, o le a tatou alu ai pea faapea aua tatou te amanaia ae aua le fai sooa, aua le fai sooa e le o se agelu le mea nei, ae aua le toe faia.

Ia o le faasologa lenei o le complain lea e fai atu nei, o le isi la mea e alu lava.....

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai.....

FOFOGA FETALAI: Ia malie le sui usufono mamalu, se i tuu atu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Ou te tulai atu e faaopoopo se isi itula atoa e taumafai ai le sui usufono e teuteu le latou mataupu a o lea e taoto le tatou Tulafono.

Tofa LEALAILEPULE RIMONI AIAFI: Ia faafetai ua maea. Ae manatua foi, o lenei afioaga e iloa uma e tagata, ua leva ona tulai mai si toeaina o Toi foi lea e fai lo matou nuu, uma lona soifua ua filemu. Ia e le tau fai atu lava i lea tulaga aua e silafia lelei e le Afioga i le Palemia mea uma.

Ona ou oo mai lea i le vaega lea, aua o le mea a e alu atu e ave sau faasea i le Council e muamua ona fesili mai le Council ia oe, ua e malie e fai i i lau mataupu? A e fai atu la e fai i i lau mataupu, ona e saina lea, ia e le oo la lau mataupu i le Faamasinoga. Ia lelei foi lea tulaga a o le faataamilosaga la lea. O le isi mea e oo foi i le faaiuga ua le mafai sau warrant of appeal a tagata ia e molia, ia o nai mea na e tatau ona tilotilo i ai. O le isi vaega taua sa ou maitauina i le Tulafono, o le membership. O le mea lenei o le tusitala aua o lea ua tatou toe foi lava i le autu na faavae ai, ina ia siitia le latou auaunga ma le faatuatua i tagata e galulue ai, e le faapea e fealua i fealua lava i le auala sau tusitala. O lea faatoa uma nei ona tatou soalaupuleina le Tulafono o Loia, so o se loia e sau i Samoa, lesitala, avatu i ai le faatagana a le Sosaiete e talia ai oe, e faapena i fomai, palama, o inisia, e tatau foi la ona faapena ia tusitala, e tatau ona lesitala uma i i ona aloaia lea ma amanaia, e tatau foi ona

i ai se minimum requirement or qualification e ave i le tagata lea o lea e i ai ma sui aloaia o lenei Sosaiete. E le gata i lea e pei o lea e i ai se malosiaga o le Tulafono e faamalosiaga uma ai tagata tusitala ina ia lesitala i i le Sosaiete ma i i le mea lea, aua afai e le fia avea isi fai nusipepa ma isi sui o le Council po o le Sosaiete, e i ai la se malosiaga i le Sosaiete po o le Council e tagofia ai mataupu a i latou nei ua ave i tua i tagata ia e le o avea ma sui auai o le Sosaiete nei? E tatau foi ona avatu foi ona avatu i le Sosaiete lenei le malosiaga foi lea, manatua e fai ai ia nusipepa e le faapea e pa puipui ae se i i ai sina integrity, a? Ia ua fiu si na toaina e tatala nusipepa, tatala nusipepa, ae tailua tolu fa masina ua leai. Pe le i ai sina tulaga aloaia i tagata tusitala ma e faatinoia lea galuega aua e taua, ia o lea foi e fai le nusipepa a lau Afioga ma le tatou Matagaluega, e le gata ua e Fofoga Fetalai ae ua e Editor in Chief. Ae i ai sou malamalama i nei mea faa-Nusipepa.....?

FOFOGA FETALAI: E le o se mea....o lea o le a e sese le sui usufono mo Faleata Sisifo, e le o au o se Editorial o se nusipepa, o lo o i ai lava le aufaigaluega ona o tulaga....agai pea i o le mataupu i au tagata ia e te fiafia e te saunoa soo ai nei, o lea ua oo tonu lava lou tiga i lau vaega, ioe, o lea la ua faatoa oo tonu lava i le tiga ua leva ona matou pologa mai i ai. Ae manaia le agai mai o lau saunoaga e agai tonu ma faatonutonu le tatou galuega i le taotoga e tatau ona i ai.

Ae ona ua tatou taunuu i le tatou taimi malolo, ia o le a faia se tatou malologa o le a faaauau felafolafoaiga pe a maea le tatou malu taeao.

E faasilasila atu o le a faataatia ese Taualumaga a le Fono Aoao mo lana malologa masani o le taeao.

Na faataatia ese Taualumaga a le Fono Aoao mo lana malologa masani i le itula e 10:43 i le taeao ma toe amatalia i le itula e 11:29 i le taeao.

FOFOGA FETALAI: E faamalo atu le onosai i le tatou Maota i lenei vaega o le aso, e talitonu le faamoemoe ua logo i tino matagilelei aua le tatou taumafagati ma le tatou faiga malologa sa feagai ai, e momoli atu ai le faafetai ma le faamalo ona o le lavapapale i le faaauauina o le tatou galuega.

E faia le tatou malologa o lo o faaiu mai le saunoaga a le sui usufono mamalu mo Faleata Sisifo, e manatu o lea ua tele ina maea le saunoaga, ua logona foi le faafofoga atu a le Malo mo le tali atu.

Tulai mai le sui usufono mo Faleata Sisifo e faaauau le saunoaga.

Tofa LEALAILEPULE RIMONI AIAFI: Faafetai i lau Afioga mo le avanoa, aemaise foi o le faamalositino faifaipea mo le Palemene ma le tausiga, faamalo faafetai. E mautinoa e uma se tatou fonu ia ua faaopoopo nisi a ta kilokalama i le lelei o taumafataga, ia malo, faafetai.

E le o toe tele foi se manatu na o le mea lea e faamamafa i ai i lou manatu, e muamua lava i le tuueseeseina o le mea lea o le Council ma le Sosaiete, ia o le faatupeina, aemaise lava la lou manatu i le mea lea o le membership i sui auai. O le a tonu le faiga aua afai nei ae i le filifiliga saoloto lava o le tagata tusitala ia e le mafai ona auai mai i totonu o le Sosaiete, ia o le a le mamalu e i ai? E tatau ona faamamalu le Tulafono ma omai e fai faatasi nei mea ia lelei,

aua e leai lava se mea e te popole ai i le tulaga o le faatinoina o galuega, aemaise lava i totonu o le au tusitala – ma e le o aiaina foi e le Tulafono le faatinoina o le latou galuega e taua, e le o aiaina e le Tulafono, fai lava le galuega i le mea e gata ai, pau lava lea o le mea, ia tonu ma sao ma paleni le faatinoina o le galuega. Ia aemaise o le avanoa taua lea i lou talitonuga, e tagofia ai a latou mataupu ma faasea a le atunuu i totonu o le Council lea, e faaititia ai le ave i tai i le Faamasinoga, aua e le o taofia foi e le Tulafono le ave sao o lau mataupu i le Faamasinoga pe a e loto ai. A o lea ua maua le avanoa e talatalanoa ai ia mataupu nei i totonu o le Council lea. O le isi vaega taua lau Afioga, aua e le o toe tasi se mea pei o lea e tau faamamafa lava finagalo o sui i nusipepa, ae leai, o leitio, TV ma isi vaega uma, Media, ua aafia uma i ai, lavea ai ma le tatou nusipepa, faafetai, e faamalulu atu foi i lau Afioga e taua lea auaunaga fou, e le gata i lea o le Social Media aua tasi foi lena mea, o taeao uma ua alu atu i le tatou telefoni le valaau a le sui usufono mo Aana Alofi Nu. 3, lau Afioga o le tatou morning tea o le panikeke ma le.....ia alu atu ma le lunch o le aoauli, ua fai ma avega mamafa i lenei sui usufono, faafetai, pei lava ona tatou faatasi uma ai lea i o i le tatou fale lea e i gatai, o i ina le isi mea o lea e tupu mai ai le tele o tala pepelo ia e fai nei, o le tatou fale lea e i gatai, e ta te sau o mama lo ta loto, ta te alu ua matua eleelea i tala e fai ai. Ia ae le afaina, o mea lava o mulumulugaveve a le au polokiki latou.

Lau Afioga i le Fofoga Fetalai, faafetai mo le avanoa, a o nai fautuaga na lau Afioga i le Palemia ma le tatou.....

Tofa Hon Tuuu Anasii Leota (Siumu): Lau Afioga i le Fofoga Fetalai o le mea e fia faasao.

FOFOGA FETALAI: Ia se i tulai mai le sui usufono mo Siumu, o le a le mea lea e fia faasao?

Tofa Hon Tuuu Anasii Leota: Lau Afioga o le saunoaga a le sui usufono faapea o le maota lea o lea e aumai ai tala sese, leaga o au le isi tagata o la e taufalemau, ou te le o iloa po o fea e aumai ai ia faamatalaga faapea? Ma lou faaloalo.

FOFOGA FETALAI: E pei lava ou te iloa o le Seana lea e sese i ai le saunoaga a le sui usufono.

Tofa LEALAILEPULE RIMONI AIAFI: E le i tagofia lava le suafa o le sui usufono lau Afioga, fai atu foi, a ta nofonofoga nei i nofonofoga lea, ua tele lo ta fia alu e fai sa ta feau, ae ua ta musu aua e ta te tu loa i luga fai o ta tala, o le a le tonu a? Pei o le malie o le mea.....aua a sau nei si toeaina o Alo e ese le.....sau nei si toeaina o Alo fai mai, 'Leala, ia ua ta fefe lava ta te afe atu i ina, ta te sau o ta fiafia ae ta te alu ua matua o ta faanoanoa,' ioe. Leai lau Afioga i le sui usufono mamalu, lau afioga i le taufalemau, le taufalemau o le tatou mafutaga, oi, o lena, se o le tatou mafutaga e faapena ona fai, aua le ola masalosalo, afai foi o fai se Party fou, o le a le mea e tuu ai? Fai, fai ia mafai, ioe.

Ia manuia tele le.....e faamalulu foi i lau faafofogaaga Samoa, o le a foi sa outou faafofoga mai i nisi foi o mataupu faalotoifale e patino i lenei sui

usufono ua aumai i le Palemene, ia e faamalulu atu, malu i fale le tapuaiga leaga o le mea e le faigofie.

Ae faafetai mo le avanoa mo lenei Tulafono matagofie, ia manuia tele le Fono, faafetai.

FOFOGA FETALAI: Malo faafetai. Ia o lea o le a avatu le avanoa i le sui usufono mo Faleata Sisifo, e pau lava lea o le mea e fia faasao e le Fofoga Fetalai o le Nusipepa lea e taua ai au nei ma le Palemene, e le o ni nusipepa e fai ai ni tala salalau o le lalolagi atoa ma ni faamaumauga, leai o mea lava tau Palemene lea e faasau ai ia ma faasalalau ai o outou ata. E taua tele e fai a outou lauga foi ia e agai i le palota pe a latalata i le palota le tatou nusipepa.

O le a avatu le avanoa i le sui usufono mo Alataua Sisifo, tulai mai, ona sosoo ai lea ma le sui usufono mo Faasaleleaga.

Afioga LAFATELE PATRICK LEIATAUALESA (Alataua Sisifo): Lau Afioga i le Fofoga Fetalai, e tulai atu ma le agaga faaaloalo i lenei foi vaega o le aso e folasia foi se lagona a o se motugaafa ia e tusa ai ma le Tulafono e pei ona folasia i lumamea. Masalo e le tele foi se faamatalaga i lenei Tulafono, ae talu ai ona o le taua tele, ia o le ala lea o le matou tulai atu e folasia foi se lagona a o se sao foi e tusa ma lenei Tulafono Tau Faaofi.

O le matou maitau lau Afioga i le Fofoga Fetalai, o se Tulafono ua leva ona tatau ona aumai i totonu, a silasila lau Afioga i le tele o faasalalauga faapea foi ia tuuaiga e pei ona saunoa i ai nisi o sui usufono, e talitonu e leai lava se isi o tatou e le ioe i le vaega lenei.

Lau Afioga i le Fofoga Fetalai tasi lenei auaunaga ese le taua o tulaga tau faasalalauga, a silasila i ai e le mafai ona malamalama foi le atunuu ma so o se atunuu lava, pe a leai ia lea foi itutino o le tatou galuega. A o le maitau a lou nei sui usufono, e sao lelei lava le saunoaga a le sui usufono mo Faleata, e tatau ona matua seki lelei se standard e ausia e i latou o le a faatinoina lenei galuega ina ia mafai ona faasalalau ma faasoa paleni tulaga o faamatalaga e faalogologo i ai le atunuu lenei. Silasila lau Afioga i le Fofoga Fetalai, se e le o tafao tafao lava i le maketi sau faasalalau. O le isi vaega taua i le Tulafono lenei i le matou maitau, ia faasalalau mea amiotonu. O le isi mea, o le tele o faamatalaga e sau ua it's always two sides story, a uma ona faamatala mai le tala a le la pito ona e sau lea i i, a o le tele o faasalalauga lenei, e faasalalau itutasi lava. O le isi mea lau Afioga i le Fofoga Fetalai mo le silafia e le Maota lenei, e sao lelei le saunoaga a le Palemia, o le atunuu lenei e fesootai aiga, e fesootai gafa, ae a faasalalau atu la mea e le talafeagai ma tuuaia ai ia se igoa o se isi e tau i ai lea, o i lea e manumanu i ai le taofi, ae faafetai i lau Afioga i le Palemia, ia ua mafai ona aumai lenei Tulafono taua. O lea foi sa saunoa le Afioga i le Minisita mo le Soifua Maloloina, a tau loa o mea leaga ona aumai laia ae a tau o mea e faaletonu ai le Malo ona fiafia lea e faasalalau. E i ai lau malaga lata mai nei lava na ou afea ia Kuiniselani e asi foi ia lou tuua e nofo i i, ae ou taunuu muamua atu lava i le isi faleoloa Samoa o la e tuu mai ai lou ata ia faatea au e le Malo talu ai ia ni inuga ava. O le tusitala lea na tusia, o lea sa ou tilotilo i lalo i le tagata lea e saina mai, o se tusitala matua lava, masalo o la e malamalama lelei lava i ai Saleaula, o le a ou le taua le tusitala lea. Ia na ou taunuu mai lea i inei ma aumai le nusipepa lea ma fesili mai lou itumalo, 'O le a ea le inugaava lea faapea Lafai na faatea ai oe?' Ua laki o le itumalo e matua le tofa, e le faalogologo tala. Ana se

itumalo e faalogologo tala ua leva foi ona tafi au. Na ou faamatala i ai, afai o se alofi a o lea ua tusi le tala lea i le inugaava, e mafai ona refer i le inugapia. Silasila oe i le vaivai o lenei tusitala?

Lau Afioga i le Fofoga Fetalai, e matua lagolagoina e lenei sui usufono le Tulafono Tau Faaofi ua faataoto mai. Ma le isi mea, se e pala le maa ae le pala le tala. O le matou fautuaga, o le a le safea le maaveave le fua, e le aafia uma le galuega a tusitala, aua e i ai tusitala lelei ia e i ai. E i ai foi tusitala e fiafia tele latou te milomiloina le tele o faamatalaga. O le tusitala lelei ma le tusitala e malamalama i le galuega, e tatau lava ona aumai pitolua uma faamatalaga o le faalavelave lea e tupu. O lea sa saunoa le sui usufono mo Faleata Sisifo, sa tatau foi ona o i ai po o le a le mea lea e tupu. Ia o le a alu alu lava lena matai fai mai e faatea le matai o la e tautua i le nuu ma...

Ia o le matou tala lea i lenei taeao, e leai foi se agaga e sii se ta i lea foi itutino o le galuega, e taua tele. E pei lava ona matou fai atu, tasi lea auaunaga taua e mafai ai ona faasopolia uma le tatou atunuu i nisi o mea o lo o tutupu ma e tatau lava ona faailoa i le tatou atunuu. Ae a fai loa faapea le tatou galuega, ou te le fai atu, o le atunuu lenei o le atunuu tofi, a le vave lau faatafa e fasi oe e aiga o tagata ia e te tusia i ai faamatalaga ia.

O la matou tala lea lau Afioga i le Fofoga Fetalai e lagolagoina ai lenei Tulafono Tau Faaofi taua, ua leva ona tatau ona aumai i totonu, leaga e le faapea o le a tuufau le vaega lea, e tusi atu lava latou faamatalaga e sese ae tusi lava. Ia manuia le Fono.

FOFOGA FETALAI: Malo saunoa. O le a avatu le avanoa i lea Itu o le Maota i le sui usufono mo Faasaleleaga Nu.4, tulai mai.

Afioga PESETA VAIFOU TEVAGA (Faasaleleaga Nu.4): E muamua lava ona momoli atu le faafetai i lau Afioga i le Fofoga Fetalai ona o lea ua maua le avanoa o lenei itumalo e taumafai atu ai foi sona sao e uiga i lenei Tulafono Tau Faaofi matagofie. Ma e momoli atu foi lau faafetai i lau Afioga i le Palemia ma i latou na tapenaina lenei Tulafono Tau Faaofi, ona o lenei Tulafono Tau Faaofi, o se Tulafono Tau Faaofi e pei ona saunoa nisi o sui usufono mamalu ua leva ona tatau ona aumai i totonu o le Maota. I lau la maitau i le tulaga o i ai nei lenei Tulafono Tau Faaofi i Tusitala ma le Au Faasalalau, ou te talitonu ou te faaigoaina le Tulafono Tau Faaofi fou lea ua i ai nei, tusa o lea ua mulimulitai lava i le Faavae o le tatou Malo. E pei foi ona saunoa le Tamaitai Minisita mo Faamasinoga i le aso ananafi, so o se Faalapotopotoga po o se Vaega Tumaoti o le tatou Malo, e tatau lava ona i ai ni Tulafono e taiala ai ma laei ai lea Faalapotopotoga. I le taimi lenei i le freedom of the press, o lea e telenoa. O le freedom lea po o le saolotoga lea, o lea e telenoa e leai sona laei. A ou te faafetai i le Afioga i le Palemia ma i latou na tapenaina, a lea ua latou fausiaina le laei e laei ai le freedom. O le a le freedom? The freedom of the truth, le mea moni, moni ma le faamaoni. Afai foi e tatou te faamamafaina lenei Tulafono Tau Faaofi, ona tatou maitauina lea o le Faamasinoga i le taimi o le a valaau ai se faamasinoga o se tasi, ona aumai lea i le Faamasinoga le filifiliga ma le saolotoga ia te oe, pe te finagalo e fai sau molimau tauto, ia po o le pule foi o oe po o le le faia o sau molimau tauto. O lona uiga, o lea lava e aumai e le Faamasinoga le freedom, e free lava oe i mea uma.

I totonu o le Tulafono Tau Faaofi, a lea ua aumai le laei e laei ai le tulaga o lea e i ai nei, aua o lea lava e saoloto le Au Tusitala, o lea lava e saoloto le Au Tusitala, e pule lava latou ia i faamatalaga ma faasalalauga. Na saunoa foi se tasi o sui usufono mamalu i se taimi e le i mamao atu nei i le tele o le tupe a le tatou Malo o le a faaalu i le faatinoina o lea foi Sosaiete po o le Council. Ae ou te tau atu lava e au ia, sa avatu foi i lau lauga talu ai i le Tala o le Tupe, e le taitai ona talafeagai tupe ia o le a faaalu i aafiaga o tagata, le aafiaga o le tagata. E le aafia na o le tagata e solia le Tulafono, e aafia lona aiga, e aafia lona nuu, e aafia le itumalo. Ae a le suafa? The value lena e sili ona tele le tupe e faaalu ai.

O lea la ou te faafetai ai i lenei Tulafono Tau Faaofi o lea ua aumai le laei e puipui ai, le freedom lea, aua o lea e faapea mai le Au Tusitala, o le latou aia e saoloto le aiatatau. A o le mea lea e tupu, o lea e telenoa le freedom. A lea ua aumai e le Malo le laei lea ina ia puipui ai le freedom lea, e pei lava ona ou avatu, e puipui ai le freedom lea. E faasalalau mea moni, e moni ma le faamaoni. E pei lava o le tautoga foi lea e fai i totonu o le Fale Faamasino, 'Ou te tauto atu i le Atua Silisili Ese o mea uma ou te tautala ai, e moni ma le faamaoni.' E faapena. O le ala lena e ala ai ona ou avatua le tulaga lea, leaga o faasalalauga nei o lo o faia, e tele lava i lau vaavaai, leaga o au le isi sui usufono. Ou te talitonu foi, e matua tele lava tupe a nusipepa na maua. A leai foi ni mea e tutupu, e le alumia la outou nusipepa. E taua la, ae faalavelave, e le o mulimulitai le Au Faasalalau, e tataua ona aumai mea moni, ae aua le aumaia mea e le moni. Aua a silasila foi i le aumaiga o le mataupu ia te au, e le i mamao atu nei, e faapena foi le isi mataupu ua leva ona uma. Ae fai mai le tala a le nusipepa i lau faitau atu, 'O le faipule foi lenei, o lea foi ua toe molia mai foi, ae sa molia foi o ia i le moliaga na mafua ai ona oo le maliu, ae o le faalavelave, ua toe tau mai foi ma le igoa o si ou itumalo.

Silasila la outou i le tulaga lea e pei ona ou fai atu, o lea ua silafia e le Au Faasalalau ma le Aufai Televisi. O le iuga o lena faamasinoga, na solofua. E mafua aisea? Ua sese le moliaga a leoleo. Se i vaai la i le le paleni o mea ia? A o mea ia ua aumai i le faasalalauga, o le sui usufono foi lea, ua toe molia na mafua ai ona oo le maliu. O lea la ua tosina ai ma finagalo o tagata o lou itumalo, e tasi lava le mea lea e autasi i ai finagalo o lou itumalo, leaga le sui usufono e leaga. Silasila, leaga le sui usufono e leaga, ua tauvatea le itumalo, talu ai e le o aumaia. Ana faapea la e aumai ai ma le faaupuga lea, 'Na solofua lea moliaga ona e sese.' Vaai la i le matagofie? Le paleni la lena o lea ou te fai atu ai. A o le faalavelave, o lea e lafi mai ai i tua ma le tulaga lea, e le gata i le tauvatea ma le faaleagaina o lou tagata, a o le alumia. E pei foi ona saunoa se tasi o sui usufono mamalu, e manaia foi pe ana se i pue mai foi pue tuu i se isi vaega o le nusipepa. A o le pito mai lava lea i luma, e pei o le agaga lena e lagona ai lou faanoanoa. O le agaga foi lena e ala ai ona manatu e fia avatu lava se sao o lenei itumalo, ou te matua lagolagoina le Tulafono Tau Faaofi, ina ia nofo fuafua foi i latou o lo o faasalalauina mea nei, e i ai le taiala o mea uma, e le mafai ona tatou ola i lenei soifuaga e aunoa ma ni puipuiga ma ni taiala, ina ia faapea ona tatou mulimulitai i ai. Aua o le tulaga lea e i ai, o lea lava e faasalalau e outou ona o le tulaga lea i le aiatatau, o le freedom e pule lava outou. Ae galo ia te outou le aafiaga lea e aafia ai le tagata, o lea ua outou faasalalauina. Aua e faasalalau faasalalau ae a sau le Faamasinoga e solofua foi, e faapefea la le itu lena? O lea foi tatou te tilotilo e i ai le taimi e alu alu foi a outou faasea po o ai se isi tou te mananao i ai i ni

mataupu ua faaletonu ae oo i le isi aso ua toe faatoese mai le nusipepa. Ia o le a la le aoga e toe faatoese mai ai ua matua tauvatea le tagata ua matua molia le tagata. E le aumaia le faatoesega e fai ai le mea lea. O lea la e matua lagolagoina ai e lou sui usufono le tulaga lea ua i ai, o lea ua matua avea le Tulafono Tau Faaofi ma Tulafono Tau Faaofi e ao foi ona puipui i ai i latou o lo o faia mea nei o nusipepa ma le Au Faasalalau, le Aufai Televisi, aumai na o mea moni, aumai na o mea moni ae aua le aumaia mea e le moni, ona e tele le aafiaga o i latou o lo o taumafai e faasalalau atu ni mea na tutupu.

O se isi foi mea i lau lava tilotilo, e le tatau i le nusipepa ona toe aumaia ni mea ua uma. E lelei lava la mea sa fai ai Faamasinoga o la e faamaonia, ae o le toe lalaga mai o mea sa soloia ma le faaaogaina, silasila la se isi i ai? O lea lava e maitau e le itumalo ma le atunuu nei mea uma.

O le mea lea lau Afioga i le Fofoga Fetalai, o sou manatu lena, ma e momoli atu lau faamalo ma lau faafetai ma le lagolagoina o lenei Tulafono Tau Faaofi, ona o lea ua maua le avanoa e aumai ai. Ma lou faaaloalo lava. Faafetai.

FOFOGA FETALAI: Malo faafetai. Ia, faasolo mai i lea pito, Aveautau ona faasolo mai ai lea. Le sui usufono mo Faleata Sasae, tulai mai.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai. E momoli atu foi le faafetai i lenei Tulafono Tau Faaofi i lau Afioga i le Minisita po o le Afioga i le Palemia.

A o le i faia sou manatu, e muamua ona ave lau faamalo i le Susuga Papalii, mo le silafia o lea ua tuumalo foi le Susuga Papalii, o ia lea sa taulamua i lenei Tulafono Tau Faaofi, ma o ia foi lea sa taumafai e faamalamalama le Tulafono Tau Faaofi lenei i se tasi o semina a le tatou Palemene. Ma e momoli ai lau faafetai i lea foi tamalii, e ui lava ina ua maliu pe ua usufono foi, a o lea ua tino mai nisi o galuega e tatau ona tatou tagatagai i ai.

O le mea e tatau ona malamalama i le Tulafono Tau Faaofi lenei, o le Tulafono Tau Faaofi lenei, e le o se Tulafono Tau Faaofi e puipuia ai le tagata lea e faitio i ai, o le Tulafono Tau Faaofi lenei e puipuia ai le Au Tusitala. Aua a tagai i ai i le faamoemoega o le Tulafono Tau Faaofi, e le o i ai lava se vaega i le faamoemoega e faapea mai ai e puipuia ai oe lea o le a molia e le Au Tusitala. E tatau ona malamalama ai le Palemene, ona o le Tulafono Tau Faaofi lea a le Media Council e puipuia ai le Au Tusitala pe a tutupu ni faalavelave e oo mai ona vaai lea, o a ni auala e uia e tatou nei faapea ua faaleaga suafa i totonu o nusipepa, ona i ai lea o ni auala e uia ina ia taumafai e soalaupule ai, aua o lea lava e i ai le Faamasinoga e mafai lava ona e alu oe e ave i ai lau aiatatau. O le mea lena e tatau ona faamalamalama i le Tulafono Tau Faaofi lenei. E tele la ni fesili na tuu atu i le vaega na o atu e faamalamalama. Aua e silafia e le mamalu o le Palemene aemaise foi o le faafofogaaga a Samoa, o le mea lenei o le Media, o se tasi lenei vaega e ese le power. O le power o le Media, e sili atu foi i le power o mea nei o Palemene, e sili atu foi i le power o mea nei o atunuu, aua e mafai e le Media ona faatino se mea e le mafai ona faatino. E mafai foi e le Media ona foia se faafitauli e fiu nisi atunuu e foia. O lea foi ua tatou silafia, e mafai e le Media ona sui ni Malo tetele. O le power la lea o lea e i totonu o le Media, lea e taumafai le Media e puipui, lea e i totonu i le vaega lea. Ma e silafia lelei e tatou le taua ma le aoga o le Media, aua a leai le Media, tatou te le matamata lava i ni

lakapi ia e fai mai, tatou te le faalogologo foi pe tou te faafofoga i ni talaave mai atunuu mamao. O le mea lena e ala ai ona powerful le mea lenei o le Media.

O le mea la lea tatou te mafaufau i ai, aua o le mea foi lenei o le Media, e mafai foi ona e milionea ai, e mafai ona tautaua ai oe, e mafai ona avea ai oe o se tagata tautaua o le lalolagi pe a tago le Media e sii oe i luga. E leai lava la se isi o tatou e te alu e fai i le Media, o le a le mea ua e tago ai sii au i luga ou te le i fai atu tou te o e sii au i luga? Afai o ni mea lelei e silafia e le mamalu o le atunuu ma atunuu e lelei ai oe pe lelei ai le atunuu, ailoga e i ai se isi o tatou e tusi faafetai i le Media? Faafetai i lena galuega manaia. Ae tau loa o le mea e lavea ai tatou, o i la lea e sau ai le Tulafono Tau Faaofi lea, lea e i ai lau aiatatau e te alu ai i o i le Faamasinoga, ae te le alu i le vaega lea, e te alu i i e taumafai le Media e soalaupule, aua e te alu i le Faamasinoga. O le tasi lena vaega o lea e sau i le Media, e sainsi lau feagaiga, a e alu i le Media Council, e tatau ona e malie pe sainsi le konekarate lea, a uma ai i i lau vaega, aua nei e alu i le Faamasinoga. E tasi lena vaega o lea e sau i totonu o le Tulafono Tau Faaofi.

O le mea la lea e avatu ai la ni au vaega i le Tulafono Tau Faaofi, aua o le Tulafono Tau Faaofi lenei, e faatatau i le Media. O le mea foi la lena a tagatagai i faasalaga ia e aumai totonu o le Tulafono Tau Faaofi lea, na o le apologize, e te alu e te faatoese, e te alu e te aoga, e te alu e fai nisi galuega lea e sau i i. E le o fai mai e te alu e te falepuipui. A foi o le Tulafono Tau Faaofi lenei e protect ai le Au Tusitala. E i ai la vaega e lua o le Tulafono Tau Faaofi o lea ou te fia talanoa i ai.

O le vaega muamua, o le vaega lea e sau i i o le code of practice. Sa i ai lou talitonuga, pei e le alagatau ona sau faatasi le Tulafono Tau Faaofi ma le vaega lea e taua o le code of practice. Aua o le Tulafono Tau Faaofi lea ma aga a le Media, e fuafua uma lava agai i le code lea. A o le code lea, e pule foi le Media Council i le faatinoina ma le faapuina o le code lea, e pule foi latou i le taimi e sui ai, e pule foi latou i mea e tuu i ai i totonu. O le code foi lea e fuafua i ai galuega, po o le nusipepa, po o le Televisi, po o le internet, po o a uma au galuega e fai o le Media, e fua uma i le code lea.

O lau fesili la, o a la vaega o le code lenei e tatau ona tagatagai i ai tatou ina ia tilotilo ma tagatagai i ai le Palemene ina ia fua i ai le Tulafono Tau Faaofi lea? Aua o lea e fai mai le Tulafono Tau Faaofi, e tatau ona abide i le code lea of practice. O lea la i lou manatu, sa tatau ona aumai faatasi ma le code of practice, po o a vaega ia e mafai ona saisaitia ai tagata tusitala, aua a fai mai nei le code of practice e mafai lava e le Media ona fai le mea lea tou te saunoa i ai, ia na o le Faamasinoga lava e te alu i ai.

O le vaega lona lua lau Afioga i le Fofoga Fetalai, o le vaega lea e sau i le Tulafono Tau Faaofi, “Afai ua faaleaga se vaega o se tasi o le atunuu e le Media, se tala foi lele e faaletonu”. O le isi vaega e mafai ai ona ave lau faasea lea i totonu o le Media Council, o lou tusi lea i le tagata sa ia tusia le tala. O lea la e fai mai le Tulafono Tau Faaofi i i, e muamua ona e tusi i ai i le 10 aso mai le aso na faasalalau ai le vaega lea. A uma le 10 aso lea e le i tali mai lava le tagata lea, ona e toe tusi lea i le 20 aso. O lau fesili, aisea? Aisea le mea o le a ou toe tusi i ai i le 20 aso a o lea ua uma ona ou tusi i ai? E le o se fault o au lea o le a ala ai ona le tali mai le na tusia le vaega lea.

O le vaega la lea o le Tulafono Tau Faaofi, pei ona ou fai atu, o lea foi e toe puipui ai i i ma le Tusitala, aua foi la tasi lea vaega a faapea e te mana'o e ave

lau faasea i totonu o le Media Council, e tatau ona fai muamua le vaega lea. Afai la e le tali mai le na tusia le tala lea e faaleaga ai se tasi e pei ona saunoa nisi o sui usufono i le 10 aso, ia, o tagata foi tatou, e tasi atu loa i le 10 aso nofonono loa ma alu ai lava. E tasi lea faiga o lea e fai e le Tulafono Tau Faaofi ina ia aua ai ne i oo se mea i o i le Media Council, aua o lea e fai mai, e te toe tusi i ai i le 20 aso. O lona uiga a e le tusi loa, ua le talia la lau faitioga, lona uiga ua le oo lau faitioga i le Media Council. O le tasi lena vaega o le Tulafono Tau Faaofi faamolemole lau Afioga se i e toe tagatagai ane lava i ai, pe aisea le mea o le a faasalaina ai au lea e taumafai e fai le faitioga pe manao e foia le faafitauli lea ma le Media Council i le toe tuu mai ia te au o le isi 20 aso e toe avatu ai lau tusi.

Ona pau lea lau Afioga, ae momoli atu lau faafetai tele i lenei Tulafono Tau Faaofi. O le Tulafono Tau Faaofi lenei i le amataga pei ona silafia, o le tele ia o matou fesili na matou fesili ai i le Afioga lea ia Papalii i le taimi na faatino ai le Tulafono Tau Faaofi lenei. Ae ua ou faitau faitau i le Tulafono Tau Faaofi, ou vaai atu i le Tulafono Tau Faaofi, e leai, o le Tulafono Tau Faaofi lava ia, e protect ai le Media. E le o se Tulafono Tau Faaofi e protect ai i tatou nei e faitio i ai le Media. O le mea lava lena e tatau ona malamalama i ai o la e lava e i ai le Faamasinoga e o i ai tatou ia, a o le Tulafono Tau Faaofi lea, o le Tulafono Tau Faaofi mo le Media Council. Ma le faaaloalo lava i lau Afioga.

FOFOGA FETALAI: Malo faafetai le faamanatu, faafetai foi le faamalamalama i le sui usufono mamalu.

Tulai mai se tasi o sui usufono mo Salega, Afioga Afualo Wood Uti Salele. Ia, se i avatu muamua le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, a o le i saunoa se tasi o sui ufono mo Salega, Afioga Afualo Wood Uti Salele, se i uma ona ou tulai atu lea e tau atu le sese i sini o le mea lea na saunoa ai nei le sui usufono lea faatoa uma atu nei, i lona faapea mai, na o le puipuiga lava o le Media. O lena e manino lava, o le mea lena e leaga ai lou le faitau lelei o le Tulafono Tau Faaofi ma malamalama. O lena e faataatitia mai ai auala e toomaga i ai i latou ua afaina ae fiu e taumafai se faiga e le kea mai i ai le Media. O lena foi e i ai ma le faasalaga e ono oo i le \$5,000. Ua matua sese tele lau saunoaga lea na aumai nei. Se i ou toe agai i ai pe a uma le saunoaga a se tasi o sui usufono mo Salega, Afioga Afualo Wood Uti Salele.

Tofa Aveau Tuala Lepale Niko Palamo: Lau Afioga i le Fofoga Fetalai, e ui lava o lea ua saunoa le Afioga i le Palemia e sese, a o lea ua ou talanoa atu. A finagalo le Afioga i le Palemia ou te tago e faitau atu le mea lea ou te talanoa atu ai, o le a faitau atu.

FOFOGA FETALAI: Ia, o lea ua maua lou finagalo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lena o lo o manino, se faitau lelei ae aua le fiapoto. O lena e manino i lalo o le Fuaiupu 28. A e faitau

faitau uma ae le o le faitau na o le isi vaega. O le tele o lou fia lelei i le Media lena ua faapena ai lau lauga ae le faitau lelei le Tulafono Tau Faaofi.

FOFOGA FETALAI: Ia e manatu o lea ua malamalama.

Tofa Aveau Tuala Lepale Niko Palamo: E leai e le o se fiapoto, o mea o lea e sau i totonu o le Tulafono Tau Faaofi le mea lea, e le o se fiapoto.

FOFOGA FETALAI: Malie le sui usufono mo Faleata Sasae o lea ua manino lau folasaga. Malie o lea e malamalama o le Afioga i le Palemia e ana le Tulafono Tau Faaofi, o lea foi e tau faamanino atu le atoaga o le Tulafono Tau Faaofi atoa. O le Tulafono Tau Faaofi e agai e le gata i le Media ae faapena foi le Malo ma tagata e aafia.

Tulai mai....

Afioga Lafaitale Patrick Leiatuaalesa: Lau Afioga i le Fofoga Fetalai, o le ala lea o lou tulai atu, ua tau fenumiai i lou mafaufau, o le Tulafono Tau Faaofi, o lou talitonuga lea e i ai, o fea la a sulu i ai le tagata lea ua tuuaia pe a faapea o le finagalo lea o le sui usufono? E sulu i fea?

Tofa Aveau Tuala Lepale Niko Palamo: Lau Afioga e te sulu i le Faamasinoga. A lea na avatu i le lauga?

FOFOGA FETALAI: O le finagalo lava lena o le sui usufono. O lea sa faaali manino, o lea ua tali manino le Palemia ua malamalama le mataupu. O lea ua malamalama le mataupu Palusalue.

Afioga Hon Palusalue Faapo II: Lau Afioga i le Fofoga Fetalai, o le mea tonu lava lena o lea ou te tulai atu ai, o le fiapoto mai o le isi sui usufono i le lauga a le Itu lenei.

FOFOGA FETALAI: Leai malie Palusalue....

Afioga Lafaitale Patrick Leiatuaalesa: E sao oe e le o fai atu au ia oe, o lea ou te fai i le sui usufono mo Faleata Sasae.

Afioga Hon Palusalue Faapo II: Lau Afioga i le Fofoga Fetalai, na amatamea le Afioga i le Palemia, nofo i lalo e le avatua le avanoa ia oe....

Afioga Lafaitale Patrick Leiatuaalesa: Aua e te fai mai ou te fiapoto leaga e le o se tala a oe lea e fai mai, o le tala a au lea e fai atu ia Aveau. O fea la a sulu i ai le tagata lea e tuuaia?

Afioga Hon Palusalue Faapo II: O lou lava lena finagalo.... Fuafua lelei o lea e taumafai atu lenei Itu. Aua le aumaia faaupuga e pisa ai.

Afioga Lafaitale Patrick Leiatuaalesa: A o a tala e... e le o se tala a oe lea e fai atu ai au, o le tala a Aveau. O fea la o le a sulu i ai matou? Se aua le.....

FOFOGA FETALAI: Lafaitete, alaala i lalo le sui usufono mamalu. E le o se mea e lagalaga ai le tatou Maota. O lea na faaali manino lava le finagalo o le sui usufono mo Faleata Sasae ia, lea ua tulai le Palemia faamanino, e sese le folasaga ona o le atoaga o le Tulafono Tau Faaofi, e aafia ai le Au Faasalalau ma e o aafia i faasalalau. O lea la ua manino, e leai la se mea e toe fai ai se finauga, o lea ua saunoa le Palemia, o le Tulafono Tau Faaofi e puipui i itu uma, e le na o se vaega pei ona faasaosao le saunoaga a le sui usufono mo Faleata Sasae. Ia ua uma le mataupu, e le tataua ona faia fua se finauga. O lea foi na avatu le avanoa ona o lea sa e saunoa i le tulaga o oe sa aafia, o lena foi e sagatonu lou finagalo.

Malie le Taitai o le Itu Agai o lo o sagatonu le tatou mataupu. Aua e te atugalu i nisi o tulaga o lea ua....

Afioga Hon Palusalue Faapo II: Na pau lava le mea lau Afioga i le Fofoga Fetalai, o lea e taumafai atu lena Itu, ae a lafo mai loa upu faapea....

FOFOGA FETALAI: Ia, o le a le matuia, e le o ni upu fou. E le o le agaga lena sa tulai mai ai.

Afioga Lafaitete Patrick Leiatuaalesa: Se e valea le saunoaga a le sui usufono lea. O le atoaga o le Tulafono Tau Faaofi, o lea e aafia ai ma matou e sulu pe a faapea e faaliliu le Tulafono Tau Faaofi. Ae le o le fai atu ae fai mai e puipui na o le Media, a o fea la o le a sulu i ai matou nei lea e fai atu?

FOFOGA FETALAI: Malie Lafaitete, o lea ua ou maua lou finagalo.

Tofa Aveau Tuala Lepale Niko Palamo: Lau Afioga i le Fofoga Fetalai....

FOFOGA FETALAI: Malie Aveautau, o lea ua ou faamuta atua le mataupu, o lea ua manino. E le o se tulaga – silasila, o lea lava ou te manatua, o lea foi ou te malamalama atu i le tau faatoatoaga e le faigofie le mataupu. A o lea ua manino ma malamalama lea ua faamalalama atili e le Malo, ia toa laia o le tai.

Tulai mai se tasi o sui usufono mo Salega, Afioga Afualo Wood Uti Salele.

Afioga AFUALO WOOD UTI SALELE: Faafetai i lau Afioga i le Fofoga Fetalai mo le avanoa. Se o aso faapenei e iloa ai le tautai matapalapala, ae malo lava le faatamasoalii. O lou tulai atu lau Afioga i le Fofoga Fetalai, ona o le taua ia o lena Tulafono Tau Faaofi. E fia faalauiloa foi lau faafetai faapitoa lava i le Susuga i le Papalii Ualetenese ona o le tapenaina maeaea o lena Tulafono Tau Faaofi. Atonu ua le nofoia le nofoa, ae o lea lava ua oo mai le vaega ma le tele o le tapenaga o le Tulafono Tau Faaofi. Ia o le Tulafono Tau Faaofi lava ia mo le manuia o tagata uma. Ae i ai le upu a le matou Ekalesia Metotisi ou te fiafia lava e pesepese ai, ou te masalo foi o upu na e aoga i le Tulafono Tau Faaofi lena. E faapea; “Tau maia nei le tala, Tau maia nei le tala, O le Tala i le alofa o le Atua.” O le uiga la o le pese, na o mea moni lava mea e manaomia. O le tala foi lea e tau mai i i le pese a le Metotisi, o le tala moni lava i le maliu o Iesu. O le auga atoa o le Tulafono Tau Faaofi lena, e le faapea o le a tulituli matagau ni masei o le Au Tusitala

po o i latou foi o le Au Faasalalau, ae puipui foi ma le aiatatau o le o le a aafia i lalo o le soona faasalalau ae le o atoatoa le amiotonu lea pei ona ou fai atu ai, lea e tau i totonu o le pese lea a le Ekalesia Metotisi, le matou Ekalesia.

Ae silasila foi lau Afioga i le Fofoga Fetalai, o le isi lenei vaega sili ona taua. A fua foi i auaunaga faaletagata soifua, o le isi lenei auaunaga e sili ona matua i auaunaga uma lava, mai lava i le amataga, o i e tele ina taugologolo ai ma tautau atu mea o le a tutuupu aemaise lava faigamalo e tulai mai. Atonu e le i amanaia tele i na vaitau, a o i e tele ina faaaoga e le tele o atunuu malolosi e aumai ai tala moni. O faamatalaga foi ma faamaumauga uma ia, e fuafua ai atinae a atunuu. O faamaumauga foi ia e fuafua ai le tapenaga o le lumanai o lea atunuu, ae le gata i lea, e fua i ai le malosi o le fitafita, ia iloa po o a mea la e tutupu i isi atunuu, ma sailiili i ni auala fou e mafai ai ona mautinoa ua lua laasaga la e ua i luma ai le atinae a lea atunuu ma lea atunuu. O lona uiga, o le taua ia o le auaunaga. A o le Tulafono Tau Faaofi lava ia, e moni lava o lea ua sausaunua le Afioga i le Palemia, e sao lelei. E le faapea foi la o le Tulafono Tau Faaofi ua tapena ona o se isi tulaga, ae leai, e tatau lava ona faataoto ina ia i ai se taiala e tapasa ai galuega ua uma ona faatino. Aua o faiga faatemokarasi i lenei vaitau, e pei lava o le tolu o Itutino lea e i ai, o le Kapeneta, o le Palemene faapea ma le Faamasinoga, a o le isi lea vaega sili ona taua e taua faa-Peretania o le fourth estate, o le Media. Ua sausaunua foi ma ua malamalama lelei i ai le tatou Maota, e ese le taua, aua a leai nei le galuega lea e faatino mai i i, e le mafai ona maua uma e tatou le tele o faamatalaga nei e faufau ma poupu ai le atinae o le atunuu. Ae ona o le tele o mea ua tutupu, pei o lea ua agai ai le Tulafono Tau Faaofi, e le gata la ina fesoasoani ia i latou o e foi ua avea lenei itutino taua e fai ma auaunaga e taitai ai ma faatonutonu le faiga o galuega aua o lea e fesoasoani foi mo tatou. E le faapea la o le a soona fuafua lava ma tau atu le tala, ae oo mai le tala e le o se tala moni. E pei o le agaga atoa lena o le Tulafono Tau Faaofi e le gata ina fesoasoani atu ia i latou o e ua lautogia e tauave lenei Matagaluega ina ia tau mai le tala sao. Aua o nusipepa nei e i ai vaega o editorial po o vaega foi e patino lava i manatu o tagata. O i ina la e agai i ai pe a faapea e i ai ni manatu e faufau ai, ona tusitusi atu foi lea i ai o tagata ma faapea, e leai e sese lou manatu lena na aumai. A o tala ia ua vevesi ai nei le Maota ona ua aafia ai le tóatele ma o le aiatatau lea o lea e puipuia i lalo o le Faavae. Ua tele lava ina laasia foi e i latou o e o lo o atu i tua e saili mai le amiotonu, a o le aoga lea o lea ua i ai le fononua lea a le Au Tusitala ina ia mautinoa lelei ua i ai se taiala o amio taupulea ma taualoa, ae e le gata i lea, o se taiala e faatino ai amioga ina ia mautinoa ua maua le ute atoa o le faamoemoe.

O le tulaga la i le Tulafono Tau Faaofi, ou te lagolagoina foi ona e tele lona aoga. E le faapea o le a tulituliaupu lava galuega a le Au Tusitala, e leai. O lea foi e puipui i latou o e o lo o gafataulimaina lenei auaunaga taua, a o lo o i ai foi puipuiga mo e o le a aafia a latou aiatatau ona o le le faamaoni. E pei o le agaga atoa lena, a o le mea moni lava, ia moni ma faamaoni le aumai o le tala lea ina ia aua ne i tatou femisaai. Aua o le upu moni lava, o le upu e ola ai, o le upu foi e manua ai.

Faafetai i lau Afioga i le Fofoga Fetalai mo le avanoa.

FOFOGA FETALAI: Faafetai lava i lau Afioga i le sui usufono, se tasi o sui usufono mo Salega, Afioga Afualo Wood Utu Salele i lou sao taua i le tatou mataupu.

Tulai mai le sui usufono mo Gagaemauga Nu.2.

Tofa LEVAOPOLO TALATONU: Malo faafetai i lau Afioga i le Fofoga Fetalai ona ua maua se avanoa. E le umi foi se matou tala. Ona pau lava le mea e momoli atu le faafetai i lenei Tulafono Tau Faaofi taua ma e i ai foi le agaga e lagolagoina lenei Tulafono Tau Faaofi ona o se tulaga ua tatau foi ona feagai ma tatou i lenei taimi i le tele o le mau faafitauli. O lenei faalapotopotoga po o lenei foi faiga fou, o se faiga lava ua ao ona tatau ma talafeagai. Ona pau lava lea o se vaega e fia oo atu ai so matou lagona, o le tele lava o atugaluga o lo tatou Maota, o le tulaga lava lea o le le aumaia o mea moni i tusitusiga a tusitala.

E le o toe po se lilo ona o au foi le isi tagata ua matua iloga ona ou gapelu i luma o lo tatou atunuu i le Au Tusitala. O le tulaga la ina ua maea ae ou manumalo i le faamasinoga, e leai la se mea e toe faia ai upu ma tala ia a le Au Tusitala. Pe e le o i ai la se silasila a le Afioga i le Minisita i se tulaga faapena e puipui ai le soona faia o ni faamatalaga le moni?

O le isi foi itu, e i ai foi tulaga o la na mafua ona le aumaia le sao ma le moni o faamatalaga a le Au Tusitala, ona fai lea o le mea foi lea ua faaoga o latou opinión, pe faaoga foi source ma mea faapena e tau fai mai ai se faamatalaga. E mafua la le vaega lena ona e le o i ai foi se malosiaga foi lea e aumai sao ai se faamaoniga o mea o lo o suesue atu foi e le Au Tusitala latou, e le gata i le tatou Malo ae faapena foi i nisi o tagata taitoatasi. E pei e tasi lena mafuaaga e mafua ai ona alu faalou le maga loa le tusiga o faamatalaga a le media ona o le tulaga o le fiu e tauanau mai ni faamaumauga e base ai i luga ni a latou faamatalaga.

O le isi vaega, o lea ou te vaai atu i le isi vaega taua lea o le Tulafono Tau Faaofi, o le isi auga lea o le faalauiloaina o tomái faapitoa tau tusitala. O le tasi lea vaega i totonu lava o le tatou Palemene, ua outou silasila foi ma vaavaai ma tatou iloa, e faapitoa lava tagata tusitala i Palemene a isi atunuu ua i ai o latou tomái faapitoa. O tusitala na ua latou silafia lelei ona interpret le uiga moni o faamatalaga po o saunoaga a sui usufono.

O lea foi e vaai i le faiga o a tatou saunoaga ma faamatalaga, e pei e sarcastic i le tele o isi taimi. E le o i ai la se malamalamaga i le tele foi o nisi o le Au Tusitala e mafai ai ona latou taina ma faamatalaina le uiga moni o finagalo o sui usufono o le Palemene. O le tasi lena vaega o lo o fesasiai ai le tatou galuega. E le faapea la o i ai se manatu faatauvaa i le Au Tusitala o i ai nei, e leai ua lava foi o latou tomái, a o le tatou agai i luma, e ao ma tatau ona i ai le tomái faapitoa i so o se vaega e le gata i le Palemene a o se tomái faapitoa o se tusitala i mea tau fomai ma mea faapena ina ia manino ma sao lelei le faiga o le faamatalaga.

O le isi vaega lea lau Afioga i le Fofoga Fetalai, o se fautuaga ina ia silasila lelei i mea ia o facebook aua ou te iloa e lavea foi i lalo o mea nei o media. O le mafuaaga ua ou laga ai lea mataupu, o le gagana o lo o i ai i totonu. E matautia ma matuia upu o lo o faaogaina e nisi i luga i le facebook ma e le o se mea talafeagai, ma e avatu lava se tuualalo i lau Afioga i le Minisita, se i silasila ane po o le a se ituaiga faiga e control ai le faaogaina o le gagana i luga o ia vaega o media.

Ma le vaega mulimuli lau Afioga i le Fofoga Fetalai, ua siisii foi lo tatou Maota i mea e fesuluai ai. O le tele ia o mea e fesulufai i ai. A le sulu i ina ua sulu foi i le Komesina lea ua tau o le Sulufaiga, e le gata i lena sulu atu i le Community Centre lea na fai ananafi, o le Court. Se i vaai i le tele o mea e sulu i ai?

Ona pau lena o se lagona vaivai lau Afioga i le Fofoga Fetalai, ia manuia lava le Fono.

FOFOGA FETALAI: Malo fetalai lau Afioga i le sui usufono. O le tulaga ua e taua ai a tatou fesootaiga foi ia, na ona ou faamalamalama atu mo le silafia leaga o lea ua e saunoa i tusitala ae agai tonu mai i le tatou Palemene.

O lea ua i lalo o le tatou polokalame o le Parliamentary Strengthening Program, a o le i uma le tausaga lenei ua fai ni semina faapitoa mo le Au Tusitala e faamalamalama ai tulaga uma e pei o le mea lea na e taua. Ua taua lou laga ona o le mataupu ia atagia tonu ai le mataupu lea ina ia aua ne i toe fesopoi. O lea foi tou te silafia o lea foi e taumafai atu au o le Fofoga Fetalai e tau faamalamalama i le Au Tusitala le vatapuia o mea Faapalemene ma procedures ma tulaga e faasolo ai a latou faasalalauga, ae e le o nofonofo ai le tatou Maota ato'a foi ma le fesoasoani ua e taua. O lea ua aumai le Tulafono, o lo o ua i aao o le Failalutusi o le Fono, ma o se taimi o le a valaau uma ai le Au Tusitala latou te omai e fola atu tulaga i Tulafono Tumau ma le tatou Power and Privilege Act ina ia latou nofo uta i ai, o lo o i ai foi tapu ma vatapuia i mea lava Faapalemene i taimi o faasalalauga, ae faafetai o lea ua manino lau folasaga.

O le a avatu le avanoa mulimuli i le sui usufono mo Aleipata Itupa i Lalo ona tali ai lea o le Afioga i le Palemia.

Afioga TAFUA MALUELUE TAFUA (Aleipata Itupa i Lalo): Faafetai lava i lau Afioga i le Fofoga Fetalai. E manatu foi i le mamalu o le Palemene ua fai sina vela o le fala. A o le i fai atu se tala i le Tulafono Tau Faaofi, e muamua ona ou avatu le faamaisega i le Afioga i le Tama a Aiga, Afioga i le Tuiatua Mataafa Tupuola Lui ua tuumalo. E momoli atu ai faamaisega ma faamafanafanaga ia Tauiliili ma Usoalii, faapea foi Tamapaa ma alo tutusa o le Mataafa aemaise o Aiga Sa-Levalasi. E momoli atu le agaga o faamaisega ona o le tuumalo o lenei Tama a Aiga o Samoa.

E momoli atu foi le agaga o faamaisega i le susuga i le Papalii Uale o le sa avea ma Taitaifono o le tatou Media Council. E le gata i lea e avatu foi se faamafanafanaga ia Lealailepule e tusa ai ma faasalalauga na aumai nei i nusipepa. Atonu ua talafeagai lenei Tulafono ma le taimi ua aumai ai lenei faasalalauga. E saolele lava le saunoaga a le sui usufono mamalu mo Faleata Sisifo, atonu o se lape foi o le nusipepa ona sa ao ona sailiili muamua i Mulinuu po o fea e sau ai le taofiga ona faasalalau ai lea. E ui i lea, e avatu le faamafanafanaga i lau Afioga i le sui usufono ma si ou aiga aua tatou te au i le tauola au i le fagota, e a oe nei a o matou taeao.

Lau Afioga i le Fofoga Fetalai, na o sina manatu puupuu lava e tusa ai ma le Tulafono Tau Faaofi ma e matua lagolagoina lava lenei Tulafono Tau Faaofi. O le faamoemoe foi o lenei Tulafono Tau Faaofi o le faalauiloa lea o le tomai faatusitala ma le tulaga faatuatuaaina o vaega faasalalau ma tala ootoo ina ia tausisia ai aiatatau e le vaega faasalalau e pei ona aiaia i lalo o le Vaega 2 o le Faavae. O lea foi la e manino le Faavae o le Tulafono aupito maualuga lea o

Samoa, o le Supreme Law. E leai foi se isi e faafitauli i ai. O a foi Tulafono ua pasia ma Tulafono e le i pasia, e maualuga ai lava le Tulafono lea o le Faavae o Samoa.

O lea foi e maua i le saunoaga a le Minisita e ana le Tulafono Tau Faaofi, o le Jaws sa registered e pei lava o Aukuso i le aso 13 sa saunoa mai ai le Minisita. O lea la e tilotilo atu, o le Tulafono ia e faigofie lava aua o lea e peiseai o lau faaliliuga o le Tulafono Tau Faaofi i le faitau atu i pepa ia e aumai, e pei o se Tulafono e faatino ma faamalosia ai se faiga e faamalamalama atoatoa ai ma faalauiloa tu ma aganuu a Samoa ma agatausili i nuu ma afioaga. Aua e ese le sao o le alagaupu foi lele e faapea, "Aua e te togi maa pe afai e te nofo i se fale tioata." E sao lelei lava lenei alagaupu.

O le uiga foi la o le Tulafono Tau Faaofi lenei, o le e tusitala ia tusi ma le faautauta, tusi ma le faamaoni, tusi ia paleni mea o lo o e tusitusia ma lau amiotonu. O lau interpreter ia aua ne i fesiligia aua e pei foi ona saunoa nisi o sui usufono, o le faamaoni lava, amiotonu ma ia taumafai e faapaleni tusitusiga. E le faapea e faapito manu ia Tasi ona toso ai lava lea o lau tusitusiga ma faaalu aua e eseese uma lava tusitusiga. O le tasi foi lenei atamai po o le tomai faapitoa e ese le taua ma le manaia i le faalogologo. I lea foi itu, aua le seetia i le malu o le tai taeao i le see o lau peni i le tusitusi e pei ona saunoa nisi ua mavae, silasila totoa po o ai lenei e fai i ai au tusitusiga. Ia fua i luma ma fua i tua ma fai fuafua i la tatou ava fatafata aemaise o le ava fesilafai. O le mea e sili ona taua o le faaaloalo.

E pei foi ona ou lauga ai i se isi taimi ua mavae, o tatou lava o tu ma aganuu ma e faamuamua lava le faaaloalo i so o se mea, ae e le o le silasila atu lava ua see le peni ona alu lava lea ona ua manaia. E pei lava o le faatusa foi lea i le faaaloalo. O lea o le a fai atu sau faatusa. Afai nei e toso le peni a le tusitala a o le a faaliliu le feaogiga a se alii ma se tamaitai, e sau lava le tama leaga ma le mafaufau faapea, ua kisi le tama i le tiene. A toso e le tusitala le mataupu lea, e mafai lava ona faapea, "Ona soso mai loa lea o le alii i le tamaitai, ua tuutuu atu lona alafau tuutuu mai le alafau o le isi. Ua feliuai o la tino, ua tuu atu le lima o le isi i le isi, faatalofa. Ua fusi mai, ona feaogi lea ma ua feiloai o la laugutu." O le kisi la lenei ua faaupuina i le faatusitala.

O le uiga o lau faamatalaga, e eseese tusitusiga. O faamaumauga na a toso e le tusitala, na o le inisi ae au i le maila le faaumiina.

Tofa Lealailepule Rimoni Aiafi: Lau Afioga i le Fofoga Fetalai, ou te le fia faalavelave i le saunoaga matagofie a le Tuiatua.....

FOFOGA FETALAI: Malie lava lau Afioga i le Tuiatua se i tulai atu le faauilavea.

Tofa Lealailepule Rimoni Aiafi: Ia manatua foi o le Tuiatua e nofo i le papalagi. O kisi faapapalagi la ia e saunoa i ai le Tuiatua, a o le kisi faa-Samoa lea e saunoa i ai le tusitala; o lenei e fetai lava.

FOFOGA FETALAI: Aua e te amanaia le saunoaga e Lealailepule. O lenei e fetai lelei lau saunoaga, o lenei e sagatonu lau o le fo i lau saunoaga. Ua masani lava Lealailepule i le ituaiga kisi tope faapea. Faaauau mai le saunoaga a le sui usufono mamalu.

Afioga TAFUA MALUELUE TAFUA: Ua maumau alii lau faamafanafanaga na fai atu nei. E leai, faafetai, sa ou faapea e te le taua si loomatua i nei mea faapenei.

E pei o le agaga o lau taumafai atu o le tomai faapitoa ma le atamamai o le Au Tusitala. A fetagofi e toso le inisi, e toso lava i le maila. A fetagofi foi e sii oe, e faasee lava oe ma sii i luga lea foi e tau see ai lau uo o Palu i nisi o taimi, ae leai e saolele lava le Tulafono Tau Faaofi. O le matua aoga lava ma lelei mo le lumanai o si o tatou atunuu.

O le Au Tusitala foi, e tele lava ina omai fai a latou tala foi nei faalogologo, ona tei lava lea ua tusi ave i le mea e le i... aua o lau au feagaiga ma le Media i Niu Silas a ou galue ai, e le mafai ona faasalalauina e le Media se mea e aunoa ma le logo o oe po o le a le mea la e o le a tusi i le pepa. E muamua lava logo oe, ona e fai atu foi lea, ia faaopoopo atu ma nai mea ia e sii ai le toaina i luga. E faapena la le faiga, aua e ogatasi le lelei ma le leaga, ia faapaleni le lelei, ia faapaleni foi le leaga. Afai e i ai ni leaga o le sui usufono po o ai lava lea o le a faatatau i ai le tusitusiga, e tatau foi ona faapaleni e avatu ai ma ni lelei o lea tagata. O le agaga lena o le Tusitala. Sa ave foi sau pepa i mea tau Media ma tusitusiga, so, o nai malamalama laiti ae le o ni mea tetele. A o le taua la o le faamoemoe i lenei Tulafono Tau Faaofi, o lea ua i ai le watch dog, ioe, po o ai o le a sulu i ai le atunuu. O tama, teine, tama, tina, o le a avea lea o se mea e sulu i ai e fai ma sulufaiga. O le Media Council foi, e i ai lava mai lea taimi, e tatau ona toe fetuutuunai. O le tulafono amata lava po o so o se tulafono e tuu mai i luma o le Palemene nei, e i ai lava le graze period ma le taimi foi faatoa tatou iloa lava le sese o le Tulafono ina ua fono le Council e i ai le mea lea e faaletonu, ia aumai sui. O lea e i ai le Loia Sili ma i latou faitulafono e suia lea vaega.

O le mea la lea ou te lagolagoina malosi lenei Tulafono Tau Faaofi, aua e taua tele. O le malosiaga foi lea o le Au Tusitala pei ona ou fai atu. E ese foi le atamai o le Tusitala i le faavasegaina o ana tusitusiga ma ana faaupuga, aua o tama ma tina o lo o i ai le tomai faapitoa, amuia foi outou, amuia outou ua avatu le taleni a le Atua e faaaupegaina ai. A ou tilotilo nei i le pepa, o Mataafa lava ma Keenan, o le tama lea o Savea Sano, Muliaga, Terry Tavita ma nisi o le tatou vaega i le Malo ma le tama lea o Hesed Ieremia lea ua i le Pulega o Tagata Tafafao Maimoa Mai Fafu. E pei o nai tagata ia, e faamalulu atu i nai isi tagata ua le maua uma outou suafa, a o se tomai faapitoa, o se tomai foi e tatau ona outou mitamita ai, e taua, a ia taua foi ona faatauaina le aganuu ma le tatou faaaloalo, lea e tuualalo atu ai i lenei avanoa e molimoli atu ai alofaaga ma tuualalo ia te outou, tautuana le tatou galuega e fai toatele, e le na o outou. E pei ona ou fai atu, e a outou nei, ae a matou taeao. E faapena lava le fuafuaga. E i ai foi le lagona o i latou e pei ona tulai mai i le Palemene nei, ua matua lailai ma ua mafatia i a outou tusitusiga. A o le tele o na tusitusiga, e leai ni faamaumauga o i ai. E faapena foi i le Malo latou. Ua mafatia le Malo i le tele o tusitusiga, o le corruption atu i i, o le corruption ifo i fea. Anusa foi le corrupt o lenei Malo, o lenei lava e solosolo lelei, o lea ua ova i le piliona le tatou paketi ma tatou mea e fai. Ua tele tupe ma faamanuiaga na aumai, tu ae lava le isi fafine Siamani i le fono na ou i ai fai mai, e \$3miliona o le a avatu i Samoa i le SIDS. Ou te le maitaua le tele o tupe ae masalo lava e ova i le \$1+piliona le tupe e auala mai, pei o nai spin offs na o le tatou fonotaga sa fai nei. O le taua lena ma le lelei, ae faafetai mo

lenei Tulafono Tau Faaofi, e lagolagoina malosi e lou sui usufono. Ia manuia le Fono.

FOFOGA FETALAI: Malo faafetai. Ia, o le a tuu atu pea ia le avanoa, e ava atu leaga o lea faatoa faailoa mai le tulai mai o le sui usufono mo Salafai. Tulai mai le sui usufono mo Faasaleleaga Nu.3, ona sosoo lea ma le Taitai o le Itu Agai.

Tofa TUILEUTU ALAVAA VOI (Faasaleleaga Nu.3): Faafetai mo le avanoa i lau Afioga i le Fofoga Fetalai faapea foi le mamalu o le Maota. E avea ia lenei avanoa e tau lava ina fai se sao ia Manuvao e tusa ma le Tulafono Tau Faaofi ua taoto nei, o lea ua manutaupae upu o lenei aso, a ua tulituliloa foi aua le Manoifofoa e pei o le tala foi lea i Salega. I lenei lava aso e ala i le Tulafono, e avatu ai se agaga lagolago pea, aua o mea na tutupu anamua, o lea ua tutupu i aso nei. O le mea foi ua tatou vaia e feilafi ma fepulafi, o mea foi na sa i ai anamua. O le vaitau o Iuta ma Isaraelu, o le vaitau faigata, sa tupu ai le mea lea ia Sa Iuta ma Isaraelu i le vaitau o le Perofeta o Hosea. O mea ia ou te fai atu ai sa le atoatoa ona o tala ma ua silasila le Atua ua le lelei le atunuu ua tele le agasala i le soona fai o tala. O Hosea le atalii o Peri, i le vaitaimi o Iotama, Esekia, Aasa le tupu o Iuta, a o le vaitau o Ierepoamo le atalii o Poasa i Isaraelu. O le mea lea e tupu, ia, faalogo lelei, ioe. O Ierepoamo le atalii o Poasa i le vaitau la lea o le feuai o itu e lua, ua tupu le mea lea, ua tele tala. O le a le... Fetalai loa le Alii ia Hosea, “Alu e nofo i le fafine talitane”. E te silafia Fepuleai le fafine talitane? O Komeri, ioe. Na nofo Hosea ia Komeri le fafine talitane maua ai Isereelu, o Loruama ma Loama. O i latou la ia na toe fafagu maia le mea. O lea la e i ai le Tulafono Tau Faaofi lea pei ona saunoa.... Faafetai i le Tulafono Tau Faaofi, e le tele lava ni upu. E ala ona leaga ona o tatou. Aua a tatou o nei tatou tilotilo.... e i ai le mea foi lea o le lelei ma le le lelei po o le advantage ma le disadvantage, o la e foi e moni le Tusitala i le isi mea. O tala, o le malamalama lea o le lalolagi. Aua ana leai nei mea, e sau lava le faamai oti tau mai iinei tatou te le iloa. A o le Tulafono Tau Faaofi, e au le taofi i le agaga o le Tulafono Tau Faaofi, e teu ma leoleo, puipui ma toe fatufatuai ina ia maua le faamanuiaga. Aua e utia loa au..... na ou manao e fai sau tala agai pe a highlight mai e i ai lou ata la e feasogi ma se isi, o mea foi nei faapena e tutupu pea, a o le mea moni. O le mea la lea, o le Tulafono Tau Faaofi, e au le sui usufono lenei, faafetai i le toe teuteu ma toe fonofono, leaga ua leai se isi e amiotonu. O lea ua tatou saili, e tilotilo foi latou i le tamaoaiga, le faaopoopoga o mea ma si faasiliga, o mea ia, e fai foi o lena a o lenei. A o manatu uma ma lagona e tusa ma le Tulafono Tau Faaofi, ua lelei ma tatau, ua onomea ma matagofie le Tulafono Tau Faaofi. A o le faatusa lena, o le faatusa lena sa tutupu nei mea, ana le toe fananau mai, tulou le fanauga lea a le toaina, e le toe lelei Isaraelu, ua sa se isi ona toe fai ni tala faaopoopo i totonu o Isaraelu ma Iuta. O le tala lea ma le faaaloalo, a o le Tulafono, faafetai tele, e au le taofi e lagolago i le Tulafono Tau Faaofi, ae aua ne i tatou toe.... aemaise lava i tatou le Maota, ona tatou tilotilo i nusipepa ma mea faapena, a ia alofa mai le Atua ia manu mai lagi lenei Fono aemaise foi o le faaalua o finagalo eseese aemaise o le faafofoga a le atunuu. Lau Afioga i le Fofoga Fetalai, faafetai mo le avanoa.

FOFOGA FETALAI: Malo faafetai mo le faamanatu ma le mataupu silisili i lenei vaega o le aso. Ia, tulai mai, faaiu mai lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, faafetai tele mo le avanoa. Ou te tulai atu ma le faaaloalo, leaga e taua tele le Au Tusitala, e taua tele e le gata i le tatou Malo i lena Itu aemaise foi o lenei Itu. E pei o le Au Tusitala matou te sulu i ai pe a faapea ua le oo atu so matou leo, ua le amanaia so matou leo. E tasi lea vaega taua e fesoasoani mai i le galuega a le Itu Agai. O le ala foi lea o le nofonofo lava ma maitau i saunoaga e pei e foliga mai o ni tagata leaga le Au Tusitala. E leai leaga e taua le galuega, o le latou tiute lea o le logologo o le atunuu. O ai e logoa le atunuu? Ua silasila totoa i galuega o lo o faatino, o le ala lea. E avea foi lenei avanoa ou te faafetai ai i le Au Tusitala ona o le latou galuega taua aemaise o le faatemokarasi. So o se atunuu aemaise Samoa, o le faatemokarasi lena. O lou popolega lea i le Tulafono Tau Faaofi, lea na saunoa manino le Afioga i le Palemia i le aso ananafi, o Samoa o se atunuu e tu maualuga i le Au Tusitala ma le Au Faasalalau. O Samoa e i luga i i ae i lalo uma Amerika ma le Pasefika. O lona uiga o la e lelei lava le galuega a le Au Tusitala. A o tatou, o tofi maualuluga ua tofia ai tatou ma le mamalu o le aufaigaluega, ioe, e faapena. E silasila mai i ai le atunuu, e fia iloa e le atunuu. Ae a lipoti e le Tusitala ua ita. A o le a le mea o le a tatou faitai ai? E aoga le galuega a le Au Tusitala.

FOFOGA FETALAI: Malie le sui usufono mamalu se i tulai mai le faauilavea a le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se o tatou uma lava ua tatou malamalama i le mea lea o le fia lelei. O le manaia ia o le saunoaga a Leala. E le maua ai ni ou ai i lau ituaiga lauga lena, o lena e te foliga mai o e uma lava sa lauga i le agaga fesoasoani e faatonutonuina o galuega a le Au Tusitala i e latou te le o mulimulitaia taiala, o tagata leaga. Ae tulaga ese ai lava oe. Se o le fia lelei le mea lena, o la e mateia uma mai lava e le Au Tusitala ne i e faapea lava e maua ni ou ai, na o ou ai toese e maua ai. Se i vaai i ai i le manaia o saunoaga a lau Itu lea na aumai nei? O le mea lea, se afai ua tofia oe e lau Vaega o Oe o le Taitai o le Itu Agai, ia e iloa taitai. E i ai lava taimi e fai ai saunoaga faatosina, ae i ai foi taimi e tatau ai ona e tu ma le toa, tautala i le mea amiotonu.

Afioga Lafaitale Patrick Leiataualesa: Lau Afioga i le Fofoga Fetalai o se mea e fia faasao.

FOFOGA FETALAI: Malie le Taitai o le Itu Agai se i....

Afioga Hon PALUSALUE FAAPO II: O le a le mea o le a e faasaoa ai fua au? Na pau lava lea o le Palemia e faasaoa au.

Afioga Lafaitale Patrick Leiataualesa: Se nofo mai i lalo o lea e aumai lou avanoa i le tulaga o le Tulafono Tumau.

Lau Afioga i le Fofoga Fetalai, e leai se agaga e fia faalavelave i le saunoaga a le Taitai o le Itu Agai. A e silasila lelei i lafoga ia, e lipoti loa lava e le Au Tusitala, ua ita. O le ute ma le faamoemoe o sa matou tala na fai atu i le taimi ua sola ma fatia ua alu, ia lipoti le mea amiotonu, ae leai se isi e faasea pe sii se ta. E tasi lea auunaga taua, e matua lelei ma talafeagai. Ae le o le fai mai o lafoga faapea a lipoti atu... e lipoti la i le mea sao. A o le matou tala lea e fai atu, o le tusiga o le faasalalauga lea na taua ai lou igoa, o le inugaava, o lona uiga o le inugapia pe a tatou o e faavasega i tagata e fai faiai. Ma le agaga faaloalo.

FOFOGA FETALAI: Malo faafetai.

Afioga Hon PALUSALUE FAAPO II: O le a ou le tali i ai.

FOFOGA FETALAI: Ia, e le tatau ona e tali i ai leaga o la e sagatonu lau lauga.

Afioga Hon PALUSALUE FAAPO II: O lea e sagatonu lava lau lauga, e ui lava ina saunoa mai le Afioga i le Palemia o lou fia lelei, e leai, e le o se fia lelei. O le mea lea ou te tulituli atua, o le tutoatasi.

FOFOGA FETALAI: Malie le sui usufono se i tulai mai le faauilavea a le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e manino lava lau faamatalaga, o e sa sausaunoa, e le gata o lona Itu a o lenei Itu ma aumai o latou lagona i tusitusiga ia e le o aumaia ai le amiotonu. O le mea lona, a o lea ua e saunoa mai e sese uma lava. O le mea lona na ou fai atu ai, se tuu le mea lea o le fia lelei. E tatou te iloa uma lava upu e tauave ai le fia lelei, e le o maua ai ni ou ai faaopopo, na o ai toese. O lea e faataoto atu taiala.

O le Tulafono Tau Faaofi lenei, o le Tulafono Tau Faaofi na uma ona tusia ona ave lea i le Media i sui uma lava o le Media e talanoa ai. O le uma la ona talanoa lea ua aumai ai le Tulafono Tau Faaofi lea. O mea ua uma ona latou soalaupuleina ma ioeina. Lau Afioga, o le umi ia o le process na fai, se i faatalanoa muamua ma latou, lea la e mafua ai nisi o Teuteuga ia e i totonu o le Tulafono Tau Faaofi, lea o le a ou tautala i ai e faamalamalama.

Lau Afioga i le Fofoga Fetalai o le tulaga lona, a o le manaia ia o le saunoaga a sui usufono uma o lau itu lea sa aumai nei e lagolago ai le Tulafono i le tulaga lava lea o le taitai mai o latou, aua e le faapea o tusitala uma, e i ai lava nai tusitala ua lauiloa i le mea lona, o le tusi faapipio o tala ae mataga ai, lea na aumai ai e le sui usufono mamalu o Aleipata Itupa i Lalo, le vaega lea e sau i lalo lona 4, o le taua ia masalo e le i faitau i ai ia nisi. O le Tulafono faaogaina e faamalosi se faiga faamamalu atoa ai ma faalauiloa tu ma aga i fanua a Samoa, ae tausili i nuu ma afioaga. O le a le uiga o ia mea? Ia o faaupuga ma tusiga o tala ia tatau foi ona i ai i totonu o tala na tu ma aga a le atunuu lenei, o le faaloalo.

Lau Afioga i le Fofoga Fetalai o le tulaga lona, o le manaia ia o le Tulafono ua uma ona soalaupule ma lagolago e i latou. E le faapea foi o aumai ni saunoaga a sui usufono o le Maota o faasoloatoa le latou saunoaga, o latou

saunoaga o fautuaga, o fautuaga mo le siitia atili o le standard o le tulaga o le tomai faa-Tusitala, a o lea pei e te faasea i ai, ia e matua sese atoa lea mea. O le ala lena na ou tulai atu e faasao le saunoaga.

Afioga Hon Palusalua Faapo II: Lau Afioga o le mea e fia faasao. O le mea muamua, e leai ma sau tala faapea ou te tetee.....

FOFOGA FETALAI: Malie le Taitai o le Itu Agai, se i avatu le avanoa i le faauilavea, se i avatu le avanoa i o i le.....

Tofa Hon Tolofuaivalelei Falemoe Leiataua: Ia faafetai i lau Afioga i le Fofoga Fetalai, leai ona ua matau atu e faagaulemalie le sui usufono i le saunoaga a le Palemia faapea o le lauga fia lelei, ae ua vave lava ona ou manatua le taimi a o Fofoga Fetalai le toeaina o Nonumalo e faapea foi le lauga a le isi foi sui usufono ona faapea lea o Nonumalo ina ua uma le saunoaga, ia malo i le sui usufono mo lana lauga faainuinu, ia pei la e lelei la lena a? O le lauga faainuinu, ma le faaaloalo.

Afioga Hon PALUSALUA FAAPO II: Lau Afioga i le Fofoga Fetalai, na o le Palemia lava ou te tautala agai i ai.

Lau Afioga i le Palemia o lē e ona le Tulafono, e leai ma sau tala e faapea e sese mea ia e saunoa i ai sui usufono. Lua, e le i uma lau lauga se i ou fai atu, pe ou te lagolagoina pe ou te teena le Tulafono? E fai atu mulimuli le mea lena. A o le tulaga o le Tulafono lena lau Afioga i le Fofoga Fetalai, o le tutoatasi lea ou te fai atu ai, aisea? A lea e totogi uma e le Malo, totogi e le Malo le Council, totogi alauni, totogi ia le aufaigaluega, o fea la le tutoatasi o ia mea, aemaise iinei i le Palemene, mataupu e faasino i le Palemene, mataupu e faasino i o i le Executive, faapena foi ma le Faamasinoga. O le mea lena o lea ou te popole i ai i le Tulafono. Aisea le mea e le suea ai lava e le au tusitala e faatupe ai le Council e faapena ma le.....ave i ai pei o isi Tulafono ia na faataoto mai nei, e i ai fesoasoani e maua mai, e i ai tagata e mafai ona fesoasoani, a o le faatupe uma e le Malo, po o le a le faaiuga e fai, e i ai lava le lualuagia, afai lava e sao, aemaise foi lau Afioga i au faaiuga e fai, taofiofi ai, taofiofi po o le galuega o le a fai i le fefe, o le a fai ma le fefe, o lona uiga, e toe pau i lalo le rating o tatou, aua o lea ua popole i sue, sue, sue, fai le mea lea e fai atu, fai le mea lea e tusi i lalo. O le mea lena o lea ou te tulai atu ai. O le faatupega, afai e te faatupea le faalapotopotoga e te pule ai, afai e faatupe e le Malo. O le mea lena o lea ou te lauga atu ai ma ou fesoasoani atu i le tulaga o le au tusitala, a o le galuega lava ia o le tusitala aemaise ai le va feagai o le Malo aemaise o le Palemene ma Itu Tafatolu o le Malo, e taua tele le galuega a le au tusitala, aua ne i fai i luga o le fefe, aua ne i fai i luga o le a le avatua le tupe e faatupe ai mea ia, tagata faigaluega o le Council ma mea uma.

O le mea tonu lava lena lau Afioga i le Fofoga Fetalai, o lea ou te tulai ai, ae le o se tetee i le Tulafono, e le o se tetee, a o le tilotilo i le faatupega ma le tutoatasi, talofa e. O lea e te silafia le tele o mea e tatou te finau ai lau Afioga i le Fofoga Fetalai aemaise foi i le tatou fono ma le au tusitala. E a e valaau atu sau fono ae faapea mai, aua tou te toe o i o e le totogia outou? O le mea lena o lea ou te popole ai lau Afioga i le Fofoga Fetalai.

FOFOGA FETALAI: Ia ne i...o lea o le a ou fesoasoani atu ina ne i mamafa tele lou finagalo, malie Palusalua se i avatu lau fesoasoani atu leaga o lea ua maua si mea sao lea ua e kami mai ai i totonu e faamaonia mai le tatou fonu, ae silasila foi, o le upu mamafa lea e saunoa i ai o le tutoatasi, o le tutoatasi. Silasila foi oe i le Ofisa o Faamasinoga, o i inei i le tatou Palemene lea e avatu uma ai le Tala o le Tupe e ola ai. O le agaga lena o lea e tau faamalamalama, pei o se mea mamafa foi lea a faaupu loa o le a faatupe e le Malo, o lona uiga e leai ma se isi e toe faamaoni i ai o le vaega le la. O le agaga lena o lea e tau faamanatu atu leaga o le a tau lilifa lou finagalo faapea, o le a avea ma mea o le a aveese ai le fesoasoani sili lea e tauave e le Malo mo le faatupeina o lenei Faalapotopotoga taua. O ai la Matagaluega e toso, o ai Matagaluega e afisi ma fusi? Peiseai o le agaga lena, ae a tatou o loa e tulituliloa le tutoatasi lea e te saunoa i ai, silasila i le Ofisa Tafatolu o Faigamalo e oo i le Ofisa o Faamasinoga, lea e fund atu i inei ia tatou, ae fai lava le latou tiute, e leai, leai se mea e tasi o oia ai le tutoatasi o le Ofisa o Faamasinoga, o lau ioega o lea e avatu i inei i le Tala o le Tupe lea e fai ai. O a lava faatinoga o le galuega, o la e faatino. Ae ua ou fesoasoani atu ina ne i mamafa tele lou finagalo i avea le se ma mea mamafa i le faafogafoga a le au tusitala, ina ne i meaane ua auai ma latou, ona le fesoasoani lea o le Malo, ia ona atili ai lava lea ona faaletonu le Matagaluega ma le Council mo latou. Ae faamama mai le sausu ou te talitonu o lea ua manino lau Afioga.

Afioga Hon PALUSALUE FAAPO II: Lau Afioga e le toe umi foi.

FOFOGA FETALAI: Ia malie, se i tuu atu le avanoa i le sui usufono mo Faleata Sisifo.

Tofa Lealailepule Rimoni Aiafi: Ia e faafetai atu lava i lau Afioga e taua tele le vaega lea pei o le vaega lea sa faamamafa foi i ai le...ona e pei e faatusatusa le Council lea i isi Council foi ia, e le mafai ona faatusaina i tai i le Faamasinoga i lou talitonuga, ma le faaaloalo lava, faafetai.

Afioga Hon PALUSALUE FAAPO II: Ia ua e faafogafoga mai lau Afioga i le Fofoga Fetalai.....

Tofa Hon Tolofuaivalelei Falemoe Leiataua: Lau Afioga i le Fofoga Fetalai.....

FOFOGA FETALAI: Ia malie, se i tuu atu le avanoa se i tulai mai le Afioga i le Minisita mo Tina ma Tamaitai, Atinae o Nuu ma Afioaga ma Agafesootai.

Tofa Hon Tolofuaivalelei Falemoe Leiataua: Faafetai. Leai e sao lelei le saunoaga a lau Afioga ma nisi foi o finagalo ua faaalua, o le atugaluga o le sui usufono lea ua matau atu i ai o le tutoatasi, ae a silasila i le Komiti lea latou te feagai ma le vaaiga o mataupu tau tusitusiga ma faasalalaua ma mea faapena e saili ai le amiotonu, e ese le paleni, lima sui o le au tusitala, lima sui o le atunuu, a o le Taitaifono, o le Loia ia Tutoatasi foi e le o se Loia a le Malo. O lona uiga, o lena e falala agai i le itu o le apoia o le faamoemoe o le Council lea po o le Komiti po o le a i le tau e tau ai ma le Faalapotopotoga a le au

Tusitala. Ae silasila foi o le Faalapotopotoga po o le Sosaiete a le Au Tausi Tusi, e fai lava le latou Tulafono, fai lava e latou ae fautua i le Malo e auala mai ai, e faapena foi i inisinia, e faapena le Tulafono lea a le Asosi lea o Au Palama. Ae pei ona saunoa le Afioga i le Palemia i le amataga, o lenei Faalapotopotoga ua leva ona tatau ona fai, ma o le taia lena i le faalogo i le au tusitala i nusipepa ma ofisa faasalalau. O lona uiga, a le tago atu la le Malo e fai, e o ai lava faapea. O le mea la lea aua e te atugalu i le tulaga o le taua o le Tulafono, o le sailiga lava o le mea amiotonu ma ia fai tiute i le tulaga ia usitaia le tatou Faavae, e le o le saolotoga e maua e faalele ai, ona mau ai lea, e mau e faalele mau e matau. Ia a o le amiotonu lena. O le mea la lea i le sui usufono na ou fesoasoani atu, o lea ua tutupu mea e atagia ai, ua leva ona tatau ona fai se Tulafono e puipuia ai le tulaga lea. Ia ma le faaaloalo.

FOFOGA FETALAI: Malo.

Afioga Hon PALUSALUE FAAPO II. Lau Afioga i le Fofoga Fetalai, ou te le tali foi i ai. Ona pau lava le tagata ou te tali i ai na o le Taitai o le Malo.

Lau Afioga i le Fofoga Fetalai, leaga o lea na saunoa i le saolotoga o le Au Tusitala. E i ai foi taiala e taitai ai le Au Tusitala, o a latou code of ethics ma sa aoga lelei le Au Tusitala. A o le fai mai e tafao, tafao oi,...se ua matua tumu au i le faanoanoa. Talofa e, e le mafai ona ou tali atu i le Au Tusitala.

Afioga Peseta Vaifou Tevaga. Lau Afioga i le Fofoga Fetalai.....

FOFOGA FETALAI: Malie le sui usufono, se i avatu le avanoa i le sui mamalu.

Tulai mai le sui usufono mo Faasaleleaga Nu 4.

Afioga Peseta Vaifou Tevaga. Lau Afioga i le Fofoga Fetalai, leaga o lea ua taua e le Taitai o le Itu Agai le saolotoga. O le saolotoga tonu lava lena o lea na ou avatua, o le freedom o le press, ae e te le o agai tele i le freedom o le truth - nothing but the truth. O le itu tonu lava lena o lea ou te fai atu ai.

O le amiotonu la lau Afioga i le Taitai o le Itu Agai, e tatau foi ona e puipui i itu e lua. A le freedom le la, o la e saoloto ai lava le Au Tusitala ma le Au Faasalalau? A o le faalavelave e le o i ai se pa puipui e puipui ai le freedom la e feoi ma latou. O lona uiga e tatau ona i ai se vaega o le Tulafono e taofia ai le soona faasalalau. E leai se mea o i ai i le mea moni, a le mea moni lena o lea e taumafai e avatu, the truth? O le a le mea o le a ala ai ona oo i le Tulafono pe afai e sao le mea lea e faasalalau? A sese loa le faasalalau, o le iuga lava o le court.

Ma le faaaloalo lava

Tofa Lealailepule Rimoni Aiafi. Lau Afioga i le Fofoga Fetalai.....

FOFOGA FETALAI. Malie lau Afioga i le sui usufono mo Faleata Sisifo, se i fauma mai.....ona o lea e tuuaia e le Taitai o le Itu Agai saunoaga a sui usufono sa fai. E tuga le mea lea o le taumafai e faamalamala a latou mau leaga o sui usufono ia, o lena na outou silafia o lea lava e nofonono ma manuanua talu tusitusiga.

Tulai mai le sui usufono mamalu.

Afioga Lafaitale Patrick Leiataualesa. Lau Afioga i le Fofoga Fetalai, e pei lava ona ou fai atu i le taimi ua sola, e tasi lenei auaunaga taua tele. O faatusatusaga ia na matou avatu, e tataua ona matua seki lelei le standard. E le alu, alu lava le tagata sau tautua i le auaunaga lea. E tasi lea auaunaga e maualuga tele.

O le matou tala lea na fai atu, ia fai le mea amiotonu ae aua le soona faasalalauina mea le sao, ae e leai se agaga e faatauagavale i le auaunaga a le Au Tusitala, ae e tataua ona seki se tapulaa. Ia silasila foi, a sau nei se tusitala matua fai lana tala, e te fia faalogo i ai. A sau la le tusitala foi lele e masani lava ia i le faamaai o mea ma faamilomilo mea, e tasi lava le faauigaina e le tagata.

Ma le agaga faaaloalo.

Tofa Leavaopolo Talatonu. Lau Afioga i le Fofoga Fetalai, o lea lava e saunoa sui usufono ia e toalua i le truth, a o la e truth mea ia e faasalalau e le Au Tusitala.

FOFOGA FETALAI. Le sui usufono mo Faleata Sisifo.

Tofa Lealailepule Rimoni Aiafi. O lea ou te lagolagoina foi le finagalo o si ou uso, le sui usufono mo Alataua Sisifo. Ona pau lava le mea le sui usufono mo Faasaleleaga Nu 4, se mea e lelei o tagata e tutu soo i faamasinoga - truth, nothing but the truth.

Afioga Hon Tuitama Talalelei Tuitama. Lau Afioga i le Fofoga Fetalai.....

FOFOGA FETALAI. Se i avatu le avanoa i le Afioga i le Minisita mo le Soifua Maloloina.

Afioga Hon Tuitama Talalelei Tuitama. Lau Afioga i le Fofoga Fetalai o le mea e fia faasao. O lea matou te matau atu, e le o aveesea le saolotoga o le sui usufono o le Taitai o le Itu Agai talu ai ona o lea e faatupe e le Malo lona totogi.

FOFOGA FETALAI. O le mea la lena o lea na ou fai atu ai nei ia te oe. Ua e talitonu la i le tali lea na ou.....o lea o le a e agai mai fua e fesiligia le fesoasoani a le Malo, a o le faatinoga o le faamaoni. Ia lafo i le Atua le tagata ma lona faamaoni ae aua la e te mamafa tele i le tulaga lea faapea o le tutoatasi. Lau Afioga i le Taitai o le Itu Agai, e leai se isi e ola tutoatasi, e manaomia lo tatou fesootai uma ona tatou feola faatasi lea.

Tuutuu mai i totonu le saunoaga o lea ua latalata lo tatou taimi malolo.

Afioga Hon Palusalua Faapo II. O lea o le a faauma lau lauga.

FOFOGA FETALAI. Faauma mai lau saunoaga.

Afioga Hon Palusalua Faapo II. Ou te le tali foi i le Minisita mo le Soifua Maloloina leaga e sese. Ona pau lava le mea ou te tatalo ina ia faaauau le galuega lelei o lo o faia e le Au Tusitala e tusa lava pe totogi e le Malo. Aua e

totogi loa e le Malo, o le aufaigaluega a le Malo le Council faapena ma le Sosaiete - o alauni ma mea faapena. E totogi loa e le Malo, o tagata faigaluega a le Malo, ae ou te tatalo aua e leai lava se mea e mafai i ai aua e pasia lava le Tulafono, ae na ona ou faapena atu.

Susuga Hon Tuilaepa Fatialofa Lupesoliai Aiono Neioti Sailele Malielegaoi. Lau Afioga i le Fofoga Fetalai.

Afioga Hon Palusalua Faapo II. Ua uma lau lauga.....

Susuga Hon Tuilaepa Fatialofa Lupesoliai Aiono Neioti Sailele Malielegaoi. E tatau ona ou faasaoina le saunoaga ua aumai ona e pei ua tuuaia le Malo. O lena o lo o aumai manino i lalo o le Vaega 12 o le Tulafono, o lena o lo o manino ai le faatupeina o le Sosaiete. O le vaega muamua, o tupe ua faatatauina e le Malo. O le vaega lua, o tupe maua mai totogifuapauina, tau faaee atu ma faasalaga na faalafogaina ma faaee atu i lalo o lena Tulafono. E tau fai sina lavelave o le mea lea, a o mea ia e sau i lalo i le b faa-Peretania, o revenues from fees, charges and penalties levied and imposed under this Act. O lona uiga o lea lava e aumai e le Tulafono vaega e ono maua ai a latou seleni.

O le vaega tolu, o ni tupe faameaalofa mai i le Sosaiete. Ma lona fa, e mafai foi ona maua ni a latou lava tupe maua e aoao mai ma faamaopoopo e le Asosi. E i ai le vaega e mafai ai ona faamalosia e le Asosi totogi o sui. O le mea lea e taua ai le faamalosia o le Asosi i lalo o le Tulafono ina ia pei o le Asosi a le Au Suetusi e \$200 le sao a le member i le tausaga e tasi. O lona uiga la, o le mea foi lena e tatau ona fai e le Sosaiete lena, faatasi ai ma isi tupe maua totogifuapauina o ni a latou auaunaga e fai mo le.....ni suegatupe e fai e le Sosaiete.

O le tulaga lea lau Afioga i le Fofoga Fetalai e mafua ai ona fai le vaega lea, ona e pei e foliga mai o le talosaga ina ia i ai se tupe e faatino ai a latou galuega. O le tasi lea Sosaiete o le matua le totogia lava o ni tupe e o latou sui. O lona uiga e fiu e fai a latou Tulafono e ao atu ai tupe o contribution, e leai lava ma ni subscription e totogia. O lona uiga la afai e faaauau ai pea le faamaoni o le Sosaiete e totogi a latou tupe e faagaioi ai a latou galuega, o lona uiga e pakalu atoa lava le mea lea. O le ala foi lena e sese ma e matua vaivai atoa ai le manatu lea na aumai, o le a ou tali atoatoa atu i ai i se taimi e le tatau ona faia se Sosaiete. E le tatau ona fai se Sosaiete pe a faapea na o le fonu, ae a faitau maea i le fonu lena o lena e tau mai ai o sui e faatu e le Sosaiete. O fea la o le a aumai ai sui uma lava ia? O lona uiga la e tatau ona fautua mai e le Sosaiete sui e tuu i totonu o le fonu, ae faapena foi ma le latou Komiti Faafaoe. O le mea lena ua fai ai sina televave o manatu e aveese le Sosaiete ae tuu na o le fonu. E pei o se fautuaga i se laulau e tuu na o le laulau ae aveese vae.

Lau Afioga i le Fofoga Fetalai, e le mafai ona faia lena mea. E pei o le ala lena ua ou toe tulai atu ai i le vaega lea. E i ai le upu foi lele, we had to protect fools from their follies. E tatau foi ona tatou puipuia tagata vaivai mai tulaga o vaivaiga o la e i ai ina ia faamalosia ai, aua a tuufau, o le tulaga lena e mau mau ai o tatou taimi e pasia lena mea ae leai lava se faalapotopotoga e tulai mai. A o lea ua avatu auala manino, auala maoti e faatu ai le

faalapotopotoga ina ia avea o se faalapotopotoga with teeth. Ia i ai ni nifo ae le o ni faalapotopotoga e teethless.

Leaga o lea ua ta le itula e 1.00, se i faauma atu taeao lau faamatalaga.

FOFOGA FETALAI: E momoli atu le faafetai tele i le paia ma le mamalu o le Maota Fono i lenei vaega o le aso. E talitonu ona o lea ua tatou taunuu tonu i le tatou taimi malolo, e manatu foi ua tele le tatou galuega aemaise foi o le faatulai mai o lenei Tulafono taua i lenei vaega o le aso. E momoli atu le faamalo ma le faafetai i finagalo na faaalua e sui mamalu uma o le Maota aemaise le tau talitali atu ma le faamalamalamaga a lau Afioga i le Taitai o le Malo aemaise le paia o le Kapeneta.

E faamalo atu foi i lau Afioga i le Taitai o le Itu Agai, o le tatou galuega e faapena e tuu malele lava a outou saunoaga, ae e tatau foi ona outou manatunatu ia aua ne i avatua le avanoa ona mele lea, ma e talitonu e tatau ona fetuunai lelei ia munioa ma faatonutonu folau le sa i la outou pitolaau ma lo outou pitovaa ina ia taumua tonu saunoaga i le moa o le tatou Maota. O le matagofie lena o le tatou felafolafoaiga. A o lenei aso, o a upu ma tala, o tuleiga foi ma saunoaga i le faagasologa o le tatou Fonotaga, e manatu o le a lafo i fogavaa tele. E leai foi se tautai e atoa atu i lona sa. Ia malu avea i fale aua e faapena lava lo tatou va nonofo ai. E siisii foi faamatalaga i nisi taimi, a o a tatou upu lava faa-fonotaga e aumai avatu tiuga o le vaatele ma suaga faatamalii, ae tasi lava le manulauti ia manuia Samoa i le lumanai.

E momoli atu le faafetai tele i le paia ma le mamalu o Faauluuluga o Matagaluega ma Faalapotopotoga a le Malo ua tatou faatasi i lenei aso, malo i lo outou faatasi mai. E faapea foi i le Au Faasalalau, o ula lava ma laei mo lo outou paia ma lo outou mamalu. Ua outou vaavaai i le aso, ua uma le aso o saunoa sui usufono mamalu ona o le taua o la outou auaunaga, ae e le ese le sa o lo o outou folau ai ese le sa o Samoa. O lea tatou te i le vailiu e tasi. O le a foi sa outou faafofoga mai i le piipii atu o le Taitai o le Itu Agai, o la outou tama, aua tou te tama tele foi i ai i nisi taimi. O moomooga na faalupe o nuu naumati i lenei aso ma a tatou galuega, ua faamalo atu. O le a tatou malolo o lea ua ta lo tatou taimi, tatou toe potopoto i le aso a taeao.

A o le i faaiuina le Fonotaga, ou te tatalo atu i le Afioga i le Minisita Lagolago mo Punaoa Faalenatura ma le Siosiomaga e fai se tatou tatalo faaiu, ona tolopo ai lea o le tatou Fonotaga.

Na tolopo Taulumaga a le Fono Aoao i le itula e 1:04 i le aoauli, seia aulia le itula e 9:00 i le taeao o le Aso Faraile, 24 Mati 2014.